

سید محمد بن محمد
عبد الوهاب

کلیات علوم و فنون حربیه دن

طاقم : ۲ — قسم : ۴ — مره : ۱

خلاصه فن فروسیت

اثر

سواری قائم مقامی عارف

آخذی

تعلیمات
امامتیا پاشا حضرت تدریث فن فروسیت کتابیله سائر کتابلردن

پس معارف عسکری طبعدن بالتدقیق کلیات قبول وادخال اولمشد

طبع ثالث

حرب

۲۷

استانبول — ۱۳۱۸ مایس

ترکی

— خلاصه فن فروسیت —

برنجی قسطنطنیه

بارکیرک یدکده سوقی

قنطارمه دیزکینلری بارکیرک بونی اوزرندن اشاغییه آلنوب صا
کور دیزکینلری قنطارمه اغراغنگ برال کیشلکی قدر اوزاغندن طوتوب
هات پرمغله اورته پرمق ایکی دیزکینلرک ارمسندن و دیگر ایکی نهایتکی پرمقلر
خی صاغ دیزکینک طیش یعنی جلالی طرفندن قاورار و باش پرمق دخی
هات پرمغک اوزرندن کچن صول دیزکینک اوزرینه باصدیریلور .
صول ال دخی دیزکینلری اوج طرفندن اوقدر براوزونلقده طوتولی که
یزکینلر نفرک کوکسیله خفیفجه تماس ایتمش وصول قول دخی طبیعتیه اشاغییه
صارقش بوانسون بارکیری سوق ایدرکن صاغ ال او موز خذاسنده و باش
پرمق یوقاروده و سرچه پرمق اشاغیده و طرناقلرده نفره متوجه بولمایدیر .
بارکیری سوق ایدن نفر حیوانک صول طرفنده کیدوب باشی کیروسنده
واوگ قوللری ایلروسنده بولنور .

اگر بارکیر نفری کوزلجه تعقیب ایتزایسه او حالده نفر دائما یا نظر فده
قالمق اوزر بارکیرک باشی ایلروسنه کیدوب صاغ الی یوقارویه قالدیرر .
و بارکیرک یوزینه باقیرق آنی ایلرو چکمه غیرت ایدر .
حدتلی اولوبده انسای سوقده ایلری زورایان بارکیرک نفر او موزی
خذاسنه قدر کیرو قالب دیزکینلری خفیفجه چکیرک حیوانی یانی باشنده
آلیقه و یغنه غیرت ایدر .

اگر بارکیر دهها زیاده شدتله

بارکیرك چهره سینه قارشو یوقارو قالدیروب بارکیر سکونت پیدا ایدنجه یه قدر اولوجهله سوق ایدر . اگر بارکیر صحرار ایسه بالاده استعمال اولنان واسطه لر ده قوتلیجه قوللانیلور .

فقط بوحالده نفر زور ایله آسیلورجه سینه دیزکینلره صارلما ایدر . اگر بارکیر نفری اوک ایاقلریله اورمق ایسترایسه اوحالده نفر تماماً بارکیرك اوموزینه طیانوب وقطارمه تک اغزلیله حیوانک زواندی اوزرینه نایت خفیف چارپه رق بوجهله انی مجازات ایدر .

نفرات حیوانلری آخوردن مانژه بوجهله کتوررک مانژك خط وسطیسی اوزرنده یکدیگرندن اوچر خطوه اراقله برصره وبرحذا اوزرینه طوروب بارکیرلرینی بیوک بارکیر یوللرینه همود و کوچك بارکیر یوللرینه موازی اولمق اوزره بولندیرلر .

یا یا اوله رق حذایه کلک

یا یا اوله رق حذایه کلک ایچون « حذایه - کل » قومانداسی ویریلور بوقومانداده افراد مرکز نفرینه باقه رق حذا وارهلقلری آلیرلر وحذا وارهلغی طوضروانن هر نفر تکرار ایلری باقار . قطعه بی برازکیرویه آلمق لازمکلورایسه (آتلوگری - مارش) قومانداسی ایراد اولنوره

نفرات اشبو قوماندانک (کری) لفظنده صاغ الیرندن صاغ دیزکینلری ترك وصاغ ایاقلرینی برخطوه ایلرویه آتوب مذکور ایاغک ثلث اولی اوزرنده یوزلری حیوانه قارشو کلک اوزره برصاغه کری دونر وصول ایاغنی صاغ ایاغک برخطوه یان طرفته وضع ایدر . وصول ال دیزکینلرک اوچلرینی براقیه رق صاغ دیزکینی طبقی صاغ الک وصول دیزکینی طوتدینی کی طوتار .

دیرسکلر وجوددن آیریلهرق برهمقدار یوقاری قالدیریلور . (مارش)
قومانداسی ویرلدهکه نفرات اللریله قنطارمه نك اغزانق حیوانك اغزینه
تأثیر ایتدیرهك بارکیری باش و بیونی وضعت مطلوبه دن چیقماق اوزره
طوسطوغری و فقط خطوه بخطوه کیره یورودر .

اشبو حرکت بارکیرلرک جبهه خطنه اولان عمودیتلری و حذا وارالقلری
بوزلیهرق (طور) قومانداسی ویریلنجیه قدر اجرا اولنور .

طور قوماندا سنده نفر حیوانی کری یوروتماک ایچون قوللانیلان
یاردملردن صرف نظرله بارکیرینی طور دیرر و طوغری طوتار .

بده معلم طرفندن ویریله جک (حذایه - کل) قوماندا سنده نفرصول
الندن صاغ دیزکیفی ترک ایدر و صاغ ایاغی برآدیم ایلرویه آثار وصوله
کیرو دونهك اسکی جبهه سی اخذ ایدر . و صاغ اللریله ایضاحات مشروحه
موجبجه دیزکینلری طوتدقدنصکره طوررلر .

آته بنمک

نفراتك لایقیله اسکایه بیلمسی و معلمك قصورلری ده ایوجه
کوره بیلمسی ایچون بو حرکت ایتدالرده صایی ایله اجرا اولنور .
یونك ایچون (صاییله آت بنمکه حاضر اول) اخباری و آنی متعاقب
(بر) قومانداسی ویریلور .

اشبو (بر) قوماندا سنده نفر صاعه دوتر و صاغ النده کی دیزکینلری
ترک و بوآنده صاغ النی بارکیرک بیونی اوزرندن آشیره رق وصول النی دخی
بیوننك التندن کچیرهك دیزکیفی صول الندن الور . بده صول النی
بارکیرک بیونی اورته سنه ویله اوستنه و طرناقلری یوقارویه کلک اوزره
وضع ایدر و صاغ النک یاردیمیه صول دیزکیفی دخی صول النک سرجه

ودردنجی پرمفی اراسندن کچیروب اوجنی حیوانک بویوئی اوزرندن صاغ طرفه آتار وصاغ دیزکینک اوجی دخی صول طرفه کلمک اوزره صول دیزکین اوزرندن صول اله تسلیم اولندقدنصکره صول ال خفیفجه قبادیلور وصاغ ال دخی آجیق وپرمقلری صاغطرفده اولمق اوزره جداغونک برال کنیشلکی ایلروسنه وضع اولنوب (ایکی) قومانداسنه انتظار ایدیلور .
 بوقومانداده هربرنفر ایاقلری حیوانک اولک ایاقلری حداسنه وکوکسی حیوانک اوموزی قارشوسنه کلمک اوزره صاغ ایاغنی برخطوه صاغه آتوب صول ایاغنی صاغ ایاغنک یانسه کتورر .

وحیوانک آغزینی راحتسز ایتیه جک وجهله دیزکینلری صول آووجک ایچنده قابدیره رق صاغ الک یانسه کتوریر وصاغ ال ایله برطوتام یله النوب اوچلری باش پرمق طرفدن چیقماق اوزره ایچرودن طیشارویه طوغری صول الک باش پرمغه صاریلور .

بو حالده دیزکینلر حیوانی کیروکیتمکه مجبور ایتیه جک صورتده خفیفجه کرکین بولمیدر .

بعده صول الک پرمقلری ایوجه قبادیلوب صاغ الک باش پرمفی صول ودیکر پرمقلری آجیق فقط متصل اولدینی حالده صاغ طرفه کلمک اوزره جداغونک برال کنیشلکی کیروسنه وضع اولنوب کوزلر جداغو اوستندن باقمق اوزره (آت) قومانداسنه انتظار اولنور .

مذکور قومانداده آتلو ایاقلرینک برونی وطبانی اوزرینه قالقار وعینی زمانده خفیفجه دیزلرینی بوکوب تکرار طوغریلورکن نفرقوللرینک امانه سیله بارکیره یقین اوله رق عموداً یوقارو ویمکن اولدینی قدر یوکسک صچرا یوب وجودک اغرائی حیوان اوزرینه استناد ایتدیریلان قوللر

اوزرينه تحمیل ایدلمش و بجاقلر بیتیشیک و یالکز نفرک دیزلری حیوانک وجودینه متصل اولدینی حالده نفر بتون وجوديله جزئی ایلرویه مائل و کوزلریله اوزاغه باقهرق (بین) قومانداسنه انتظار ایدر .

اشبو قومانداده سواری وجودینک وضعیتی بوزمه قسزین صاغ بجاغنی قالچه سندن ممکن اولدینی قدر یوکسکجه یان طرفه قالدیروب تکمیل وجوديله صوله دونه رک بجاغنی بوکسکسزین و حیوانک صاغریسنه طوقندیرمه قسزین اوزرندن آشیردقدنصکره غایت یواش و سکونتله حیوانک اوزرینه اوطورر بعده صاغ الک باش و اوج اولکی برمه قلیله صاغ دیزکینی طوته رق صول الدن تسلیم آلوب صول ال دخی یله بی صالیویرد کدنصکره یومروقلر وضعیت لازمه بی اخذ ایدر .

اگر اولجه معلم طرفندن صایب ایله اجرا اولنمی اخبار ایدلمز ایسه او حالده سواری آتینمکه حاضر اول قومانداسی ویرلدیکی وقت بر وایکی حرکتلریخی متعاقباً اجرا ایدر .

❦ یره اینمک ❦

بونک ایچون معلم (صایب ایله یره اینمکه حاضر اول) قومانداسنی ایراد ایدر .

مذکور قومانداده سواری صول ایلله صول دیزکینک اوجنی صاغ طرفه آتوب و صاغ النده کی صاغ دیزکینی اوجی صول طرفدن صارقق اوزره صول دیزکینک اوزرینه وضع واته بنمکده اولدینی کبی صول ال ایلله برطوتام یله اخذ ایدوب صاغ البی جداغونک کبروسنه چتال واری قویار ووجود طوضری و دیزلر ایلله بارکیر صیقلمش اولدینی حالده صاغ قوی اوزرینه خفیفجه طیانوب معلمک (یره) قومانداسنی بکلر .

مذکور قومانداده نفر صاغ قول اوزرينه قالقوب صاغ بجاغنى طبق
اته بنمکده بيان اولنان شرطله رعایتله صغرى اوزرندن کيرو آش-یره رق
عمودی وضعيتده اشاغى سارقان صول بجاغنى ايله بتشديره رک معلمک (این)
قومانداسنى بکلىر .

بوقومانداده نفر خفيفجه وعموداً حيوانک اوموزى حذاسنده اياقلىرک
برونلرى اولجه باصمق اوزره یره اينر و (بر) قومانداسنى بکلىر .

مذکور قومانداده صوله دونوب صول ال يله يى وصاغ ديزکينى
ترلد ايدوب وصاغ ال ايله حيوانک بويونى التندن صاغ ديزکينى چکوب
صول ديزکينى طوتان صول اله تسليم ايتدکدنصرکه صاغ ال صاغ يانه
صاليويريلور .

(ايکى) قومانداسنده نفر برخطوه ايلرو آتوب حيوانک قولاقلىرى
حذاسنه کلور . وصاغ ال ايله حيوانک چکسى التندن بارکيره بنمزدن اول
اولدينى وجهله ديزکينلرى طوتوب حذاينى اخذ ايدر .

واکر معلم صايى ايله اخبارينى ايراد ايتماش ايسه اوحالده نفر یره
ايندکدنصرکه هيچ برشى بکلمکسزبن بر وايکى حرکاتلرينى کندولکنندن
اجرا ايدر .

تنبیه — آته بنمک ويره اينمکده بردنبره وعجله ايله دونمک وایاقلىرى
شدتله یره اورمق حيوانى خويانديره جفندن بونلردن اجتناب اولنمليدر .

نفرک بارکير اوستنده اوطوروشى

امينتلى ومحکم اوطوروش حيوانه بيناتلر ايچون الزمدر .
متانتسز براوطوروش ايله اسامجهنک لايقيله استعمالى وبارکيرک
سهولتله سوقى قابل اوله من .

بونك ایچون هرشیدن اول بار کیر اوزرنده کوزل وقوی و محکم
اوطورمه دقت و غیرت ایتملیدر .

سوارینك وجودی اوچ قسمه تقسیم اوله رق بوزلردن برنجیسی یوقارو
قسم اولوب بوده باشدن قالجیله ره قدر اولان اعضای بدنن ایکنجیسی
اورته قسم اولوب قالجیله ردن دیزله ره قدر اولان اعضا دن اوچنجیسی
دخی اشاغی قسم اولوب دیزلردن اوکجه له ره قدر اولان (بالدرلر) اعضا دن
عبارتدر .

اوست قسمك وضعیتی - قالجیله بیلکله ره طوغری ایلری سوریلوب
بل دخی مقعرجه اوموزلر طبیعتیله دوشك و کوكسك ایلری چیقمسی ایچون
بر آز دخی کروییه چکلملیدر .

باش و بویون طوسطوغری اوله رق اوموزله ره عمود و چکه دخی بره مقدار
بویونه یا قلاشدیرلمش اولدینی حالد کوزلر بارکیرك قولاقلی اره سندن
ایلروییه طوغری بقارلر .

قوللرك اوست (بازو) قسملری اوموزلردن اشاغی طوغری وجود
استقامتجه صارقش و صیقندیسزجه وجوده یقین بولنمش اولملیدر .

قوللرك الت (بیلک) قسملری اوست قسملریله ایلروییه طوغری
برزاویه قائمه تشکیل ایدوب آلت قسمك وسطنك ایچطرفی قارنه خفیفجه
یتیشدیریلور .

الدر قبالی و بیابکرده بر مقدار ایچروییه طوغری بولکش اوله رق باش
برمقلر یوقاروییه و سرجه برمقلر اشاغییه کلک اوزره طوتیلور .
اوموز دیرسك و بیلک مفاصللری کوشك و قوللرك اوست قسملریله
یومروقلرك ثابت طوتلملری لازمدر .

اورته قسمك وضعیتی — نفر حیوانك اوزرنده بری ایکی قیناقلریله
دیگری آپیش آره سی اولق اوزره اوچ نقطه اوزرینه اوطورر .

وجودك اضرائی اشبو ایکی قیناقلر اوزرینه مساواتاً تقسیم ایدلملیدر .
اولقلری قالجیه مفصللارندن آچیلوب مساواتاً بارگیری قوجاقلامش
وکندی آغزلقلری نسبتده اوزادلمش و دیز قباقلرك ایچ یوزی آکره تماس
ایتمش و دیزلر بالاده بیان اولنان اوچ نقطه اوزرینه اوطوروشه خلل کلیه جك
وجهله کیرویه آلمش بولماید .

اوچنجی قسم — (بالذیرلر) — دیز قباقلردن اعتباراً اشاغییه
طوضی عموداً صارقیق وایاقلر بارگیره موازی و اوکچهلر ایانك برونی
یوقارویه قالدیرلمقسنزین اشاغیده طوتیلور .

سوارى وجودك اشبو وضعیتیله غایت ساکن وقوی فقط
اعضالرنی کرکین ووجودنی صیقیتیلی طوتقمسزین جـداغونك کیروسنه
وحیوانك صرتنه موازنه ایله اوطورر . و سرعتی یوررکن بارگیرك عکسی
ضربانندن طولایی یوقارویه آتلدقدنصکره اگر اوزرنده دائماً عینی محله
سقوط ایدر .

سوارى بی اصل بارگیر اوزرنده طوته جق واکا کوزل ویا قیشـقلى
وضعیت ویره جك اولان شی موازنه نك محافظه سی خصوصیدر .

هرنه قدر عجمی بینجینك اوطوروشـنك محافظه بیچون اشبو موازنه
ایله برابر بارگیری دیزلری ایله دخی مساواتاً قاورامش بولمسی لازمسه ده
مذکور قاورایش خصوصنی یالکز موازنه نك غائب اوله جغنی حس ایتدیکی
ویا خود غائب ایدلمش بر موازنه نك اعاده سنی مراد ایلدیکی تقدیرده استعمال
ایتملیدر .

اولقلرك ايچ طرفلرينك اكرى ايوجه قوجا قلامسـنه (قاورايش)
 دنيلوب بوده اوطوروشك تحكيمنه خدمت ايدر .
 بو خصوصك اولقدر صيقنديلى وزياده قوتله وقوعبولسى جائز دكلدر .
 چونكه بوكا انسانك قوتى اوزون برمدت تحمل ايدمـن .
 اشبو قاورامق خصوصنك قوتليجه استعمالى انجق يرر كن حيوانك
 بردنبره صچرايوب اوينايشنده و خندق و ياچيت و ديوار اوزرندن اتلايشنده
 و برده سريغ يورويشلرده يكدن طور مقده و درت نعل يورويشيله حيوانه
 اياق دكيشدير تمكده و بار كيرك يان صچرايشلرنده واسلحه استعمالنده در .
 ديز كينلرى طويلامق و يورر كن طور مق و يا خود حيوانى كيرى يورتمك
 حاللرنده سـوارينك ايلرويه طوغرى دوشمـا سـيچون وجودك اوست
 قسمك مقدار كافى كيرى به ميل ايتديرلمسى لازم اولدينى كى اسلحه استعمالنده
 دخى قسم مذكورك ايجاب ايدن طرفه طوغرى ميل ايتديرلمسـنه مساعده
 اولمليدر .

يوقوش چيقار كن و يا بار كيرك شاحلامسى و يوقوش اينر كن و يا بار كيرك
 چفته آتمسى حاللرنده سـوارى وضعيتنك عموديتى اراميوب ايجابنه كوره
 يعنى ايكي اوليكى حاللرده مناسب مقدار ايلرويه و ايكي صكره كى حاللرده دخى
 كبرويه ميل ايتمى ايجاب ايدر . دونمك و چرخ ايتمك حر كترلرنده سوارى
 وجودينك اورته قسمك محلى تبديل ايتمكـسـين وجودينك ثقلتنى دائما
 ايچ طرفده بولنان قيناق كيكى اوزرينه تحميل ايدر .

يوسروقلرك وضعيتيله بار كيرك قنطارمه ايله سوقى

قنطارمه ديز كينلرى طوغرى يعنى بربرينه طولاشديرلمقـسـين صـاغ
 قنطارمه ديز كينى صـاغ الك وصول قنطارمه ديز كينى صول الك سرچه

ودردنجی پرمقلى اراسندن كچمك وديزكىنلر يوزلى (پارلاق جهتلرى)
طيشارويه واوچلى هرايكى لك شهادت پرمقلىنك ايكنجى بوكومى
(مفصلى) اوزرلرنده بولنق اوزره ايلويه صارقمش بوانورلر .

يوسروقلر قبالى وباش پرمقلى جزئى بوكلمش اولدنى حالده شهادت
پرمقلىنك ايكنجى بوكومى اوزرندن كچن ديزكىنلرى خفيفجه تضيق ايدر .
يوسروقلر مقدا بيان اولنان وضعيت مخصوصه لرند بولندقلرى حالده
پرمقلىر اورت بوكوملى يكديكرينه قارشو كلنجيه قدر بيلكلر چوريلوب
يوسروقلر بربرلرندن وقارندن برال كنيشلىكى اوزاقلقد وحيوانك
جداغوسندن دخی ايكي ال كنيشلىكى يوكسكلكنده بوانورلر .
ديزكىنلر قنطارمه آغزالغلك حيوانك زواندينه تاثير ايتديكنى نفر
حس ايدمك وجهله كر كين ومساوى اوزونلقده اوله رق طوتلملير .

❦ يوسروق حركتلى ❦

يوسروق حركتلى — ديزكىنلرى طوبلامق وقوبويرومك وباركبرى
دونديرمك ايجون استعمال اولنق اوزره اوچ قسمه تقسيم اولورلر .

❦ ديزكىن طوبلامق ❦

بونك ايجون يوسروقلر بيلمكدن اعتباراً ايلرودن كيرويه طوغرى
بروجهله چوريلوركه پرمقلىر ايكنجى بوكوملى سوارينك وجودينه
تقرب ايدر وسرجه پرمقلىر يوقارويه قالفار .

اشبو چويرمك حركتيله ديزكىنلر مساوى صورتده قيصالور اكر
حيوان شو تاثيرى حس ايدوب تبعيت ايتمزه بو حالده ياوضعيت مذكوره ده

زیاد. مدت طوریلور . ویاخود حرکت مذکوره مؤثر اولق اوزره اجرا ایدیلور ویاخود تکرار قلنور ومقصد حاصل اولدقده یومروقلر حال اصلیلرینه کتوریلور .

دیزکینلری طوبلامق حرکتی قاعدهً بارکیری طوبلامق و آلیقو مقده (قراری تنقیص اتمک وبریوریش اشغی به اینک) طور دیر مقده وکیرو یور و تمکده استعمال اولنور .

بارکیرک باشی یوقارویه قالدیر مقده دیزکینلری طوبلامق حرکتی قوللارک دیرسک زاویهلری کیتدکجه کوچلمک اوزره یومروقلرک ایکسیده عموداً یوقارویه طوغری قالدیر یلورق یاپیلور . وبارکیرک بوینی طوبلامقده دیرسک زاویهلری بیوکلشمک اوزره یومروقلرک ایکسیده عموداً اشغی طوغری ایندیر یلورک دیزکینلری طوبلامق حرکتی اجرا اولنور .

❦ دیزکینلری قویویرمک ❦

اشبو حرکت ایچون یومروقلر بیلکلردن اعتباراً کیرودن ایلرویه طوغری بروجمله چویر یلورکه یومروقلرک اورتہ بوکوملری یکدیگرندن تباعد وبارکیرک بویننه طوغری تقرب ایدر .

اگر یومروقلرک بوجمله اولان حرکت دوریهلری واسطه سیله دیزکینلر مقدار کفایهده اوزامامش بولنور لر ایسه اوحالده قوللارک اوست قسملرینک وجودله تماسده بولنملری مشروط بولندیفی حالده قوللارک ایلرویه طوغری حرکتنه مساعدده اولنه ییلور .

مقصد حاصل اولدقدنصکره یومروقلر وضعیت اصلیه لرینه کتور ییلور . حرکت مذکور بارکیرک عادتدن زیاده سربسیت ویرمک ایجاب ایتدیکی و آغیر بریوریشدن سریع یور ویشسه کچیله جکی زمانلرده قوللانیلور .

چې بارکیری صاغه {صوله} دوندیرمک

(دونيله جك جهنده كى) ايچ يوسروغك سرجه برهنى سوارينك
ايچطرفنده بولنان مه سته طوغرى قالمق اوزره ايچ يوسروق بيلكدن
اعتباراً طيشارودن ايچرويه طوغرى چوريلور بو آنده حيوانك ايچ
طرفده كى ديزكينك تاثيرينه تبعيت ايدم بيلمسنه مساعده ايتك ايچون طيش
طرفده كى ديزكين دخى قويو ويريلور بعهده مذكور يوسروق سرجه
برهنى ايچ مهيه طوغرى كله جك وجهله چوريلور .

بو حالحه قيسالمش اولان ايچ ديزكين ايله حيوانك بويينه تضيق اجرا
ايدن طيش ديزكين دونشك اجرا واتمامنه خدمت ايتدك دنبشقه طيش
ديزكين ايله باركيرك بويوننه وضعيت مطلوبه ويريله چكى كى حيوانك
اوموزينك و طيش بالدير دخى صغريسك طيشارويه چيقمى منع
وبو واسطه ايله باركيره رسم ايدم چكى قوس تعيين وتحيديد ايتديريلور اشبو
حركتده طيش طرفده كى الك باش برهنى دائماً يوقاروده وقولاك بيلك
قسمى وجودله تماسده بولنديرمليدر .

دونمك حركتك ختامنده يوسروقلر وضعيت اصليله لرينه كتوريلور .
دونيلان جهته ايچطرف ومخالفه طيشطرف تسميه اولنور .
تنبيه — باركيرلى كوزلجه سوق ايتك ايچون آتیده كى قواعد
رعايت ايتك لازمدر .

بالجمله ديزكين حركتلى اولايواشجه باشلنوب صكره آزار آزار
قوتى آرتديريله رق اجرا اولنورلر .

ديزكينلر بردنبه طويلانملى وندتله حيوانك آغزينه چارپلاما مليدر.
هرنقدر ديزكين قويو وبرمك حركتك طويلامق حركتدن دها

چابوچه اجراسی لازم ایسه ده حیوانی بتون بتون سربست برانملیدر .
 باشی سرت اولان بر حیوان دیزکین چکلمسنه قارشو کلورسه اوخالده
 آزار آزار دیزکین قویو ویرمک و تکرار طوبیلامق حرکتی اجرا اولملیدر .
 ایکی دیزکین دائماً مساواتاً تأثیر ایتدیرملیدر .

یومروقلرک غیر متحرک و ثابت اولملری وجودک صاعلم وصالیتدن
 اوطوروشنه منوطدر .

قوللری صیقتیلله وجوده بئشیدیرمکدن ویرمقلری لزومندن زیاده
 بربرلری اوزرینه باصیدیرمقدن اجتناب اولملیدر .
 دیزکینلرک معتدلانه کریمش اولسی و فقط بارکیر اوستنده اوطوروشه
 مدار اولمق خصوصتده اصلاً قوللانماهی لازمدر .

❦ بالدر حرکتلری ❦

بالدیرلر بارکیرک کبروکی قسمی اوزرینه اجرای تأثیر ایدوب بونلرک
 تأثیری ایسه ایقلرک استقامتی و اویلوغک و ضمیمتی تبدیل ایتکمیزین
 یا طیماق و یا خود خفیفجه چاریمغله حصوله کلور . اشبو طیماق دائماً تدریجاً
 وقوعه کلوب بالدیرلری بردنبره حیوانک قارننه یناشدیرمق و یا خود شدتله
 چاریمقدن اجتناب اولملیدر .

بالدیرلر حیوانک درجه اطاعت و حسننه نظراً یا آرز و یا چوق اوله رق
 تأثیر ایتدیریلور .

بالدر حرکتلری حیوانی ایلرو و یا نطرقلره سوق ایتک و یا بارکیرک
 صغریسنی ضبط ایتک ایچون قوللانیه لورکه بوصکره کی حرکت بالدر
 تأثیرلرینک اک خفیفی اولوب بو واسطه ایلله بارکیرک صغریسنک طیمارویه
 جیقمنسی منع ایدیلور . بالدر یاردملری بر و یا ایکی بالدیرلرله اجرا

اولنه جفتدن برنجی حالدہ دیگر بالدیرک وقت وزمانیلہ حاضر بولندیرلمسی لازمدر .

بالدیرلر عمودی وضعیتی بوزلمقسزین باقولانک اوزرینہ ویاخود برال کنیشلکی قدر قولانک کیروسنہ تأثیر ایتدیریلوب اصلاً قولانک ایلروسنہ ویاخود حیوانک بوش بوکرلری اوزرینہ وضع وتاثر ایتدیرلمسی جائز دکلدر .

مهموز استعمالی

• مهموزلر یا بالدیرلرک تأثیرینی طویعیان تبدل بارکیلر حقنہ ویاخود بارک-یرک اک زیادہ قوت صرف ایلمسی لازمکلان زمانلردہ بالدیرلرہ معاونت ویاخود حیوانک اطاعتسزلیکی زماننہ مجازات مقاملرنہ قولالانیلور . برنجی حالہ یعنی معاونت مقامندہ مهموزلر تخمیناً برال کنیشلکی قدر قولانک کیروسندہ اولمق اوزرہ حیوانہ طیانوب حیوانک حسنہ نظراً خفیف ویا زیادہ جہ اولہرق تأثیر ایتدیریلور .

ایکنجی حالہ ایسہ نفرات اولیقلر واسطہ سیلہ حیوانی کوزلجہ قاورایوب اوطوریشنی تحکیم ایتدکن وبرمقدارده دیزکیلری کوشتدکن صکرہ بارکیری اطاعت ایدنجهیه قدر مهموزلار مهموزلرک حین استعمالندہ سواری وجودینک اوست واورتہ قسملرینک وضعیتی بوزمامفہ وبالدیرلرینی وضعیت اصلیلرندن آچامفہ دقت ایتلیدر .

انای حرکتدہ مهموزلرک قولایقلہ حیوانہ طوقنامسیچون اوکچلر دالما اشاغیدہ طوتیلور . آتلورلر بارکیر اوزرنده اولدقجہ اوطورمنی ودیزکین وبالدیرلرینک لایقلہ استعمالی اوکرنمکچہ مهموز طاقزلر .

برره بوزملق

مانژ داخلنده اوچر خطوه ارالقله ترتیب اولمش برقطعه بی برر
یوروتماک لازمکله صاغ ویا صول جناحدن وقاعده ایکی بارکیر طولی
برمسافه ایله بوزدیریلور . بوزلمزدن اول بارکیرلر ساکن وحذا محافظه
ایدلمش بولمایدور .

تعلیمچینک (آتلو صاغدن ویا صولدن برر — مارش)
قومانداسنده صاغ ویا صول جناحدن کی نفر ایلرویه طوغری حرکت
ایدوب سائرلی رلرندن قلداملرلر . اشبو جناح نفرینک بارکیرینک صغریسی
مانژ داخلنده ترتیب اولنان نفرانک حیوانلرینک باشلرینی بربارکیر بوی
تجاوز ایلدکده آنک صول ویا صاغ طرفنده کی نفر عینی وجهله ایلرویه
طوغری حرکت ایدور . وجناح نفری مانژ یولنه بربارکیر بوی یاقلاشدقده
حیوانی صاغدن بوزلمقده صاغه وصولدن بوزلمقده صوله برربع دائره
اوزرنده دوندیروب بارکیر یولنه کیمر نفرات سائر دخی عینی وجهله
حرکت ایدرک بارکیر یولنه کیمرلر .

ویکدیگری التیشیر خطوه مسافه ایله تعقیب ایدرک حرکت ایدرلر .

عاد نایوریک و طور مق

آتلولری یوروتماک ایچون (آتلو — مارش) قومانداسی ویریلور .
آتلو اخبارنده بارکیری حرکت حاضرمق ایچون آتلو اللرینی ثابت طوتوب
بالدیرلرینی حیوانه یاقلاشدیرر و اجرا قومانداسنده بالدیرلری ایله حیوانی
تضییق ایدرک ودرجه کفایه ده دیزکیلری قویو ویردرک حیوانی ایلرویه
طوغری سوق ایدر .

حيوانلر عاڧنا يورويشله يوريمكه باش-لاقلرنده يوسروقلر ايله بالديرلر
وضعيت اصليله لرينه كتوريلور .

يوريمكه ختام ويرمك ايجون (آتلو — طور) قومانداسى ويريلور .
آتلو اخبارنده باركيرك يورويشى تنقيص ايدلمكسزبن ياكز اللر ثابت
طوتيلوب بل چقورلا تيله رق وبالديرلر ياقلاش-ديريله رق يا خ-ود حيوانك
درجه حسنه نظراً آز ويا چوق تضيق ايدرك حيوان طويلا نور (طور)
قومانداس-نده نفرات ديزكينلرى طويلا يه رقدن حيوانلرني طورديرلر .
وباركيرلرينك كيروييه يوريمه سنى وصفريسنك صاغه صوله آتمنى منع ايجون
بالديرلرني يقين طوتارلر .

طوردق دك نصكره يوسروقلر ايله بالديرلر حال اصليلرينه كتوريلور .
(طور) قومانداسنده تماماً كوشيه تصادف ايدن نفرات كوشه دن
كچدك نصكره طورديرلر . نفرات بربرلرى كيروسنده وبراستقامتده طورمغه
دقت ايدرلر .

❦ راحت ايتمك ❦

بونك ايجون (راحت) قومانداسى ويريلور اشبو قومانداده نفرات
صاغ النده بولنان ديزكىنى صول الله تسليم ايدوب حيوانلرينه برمق-دار
سربسيت ويرلر . وصاغ اللريله حيوانلرني اوخشارلر . وكندولرى
دخى دها راحتجه بروضعيت الورلر . اشبو راحت ايتمك هم طورر وهم
يورركنى اجرا اولنه بيلور .

❦ حاضر اولمق ❦

(حاضر اول) قومانداس-نده سواريلر تكرر ديزكينلرى ووضعت
لازمه يى مطلوب وجهله اخذ ايدرلر .

❦ تام مانژده يان دكيشدير مك ❦

(تام مانژده يان دكيشدير) قومانداسی قولباشينك كوچك باركیر يولندن بيوك باركیر يولنه كچه چكى كوشه به كلديكى آنده ايراد اولمليدير .
 بوقومانداده قول باشى كوشه يى كچوب بيوك باركیر يولى اوزرنده باركیر بويى يوريدكده نسكره مقابل بولنان كوشه نك ايكي باركیر بويى آچيننده و بيوك باركیر يولى اوستنده كى بر نقطه به حيواني توجيه ايله بيله جك صورتده باركیرك اوك قسمنى ديزكین و بالدير واسطه سيله مانژ يولندن آيروب استقامت مذكوره به طوضرى حركت ومذكور نقطه به واصل اولدقه تبديل يان ايدوب عكسى يانله باركیر يولى اوزرنده حركت ايدر .
 نفرات سائره قولباشى بى تعقيب و آنك كى اجراى حركت ايدر لر .

❦ تعليمدن صكره صف حرب اولمق ❦

⑤

تعليمك ختامنده نفراتى خط وسطى اوزرنده يئنه بر صره اوله رق ترتيب ايتك ايچون قول باشى كوچك باركیر يولندن بيوك باركیر يولنه كچه زدن اول « قولباشى صاغه (صوله) دون — اراقله صوله (صاغه) ايلرى صف حرب اوله جق » وقول باشى صف حربده جناح نفرينك بولنه جنى نقطه حذاسنه كلدكده (مارش) قومانداسى ايراد اولنور ،
 بوقومانداده قولباشنده كى نفر قوماندانك ايراد اولندينى نقطه ده ارکیرينى صاغه (صوله) دونديروب مانژك عرضى جهته ومقابل طرفده ولنان باركیر يولنه عموداً حرکته دوام ايدر .
 اپكيجى نفر برنجى نفرك واوچنجى دخی ايكنه جى نفرك والحاصل

هر بر نفر كندی او كنده کی نفر ك دوندیکی نقطه یی بر بار کیر بوی
یکد کد نصکره دونر لر .

قولباشی بولنان نفر جناحك بولندیرلمسی مراد اولنان نقطه یه کلد کده
معلم (قولباشی طور) قومانداسنی ویرر .

بو قومانداده نفر مرقوم حیوانی طوسطوغری طور دیرر. دیگر
نفر اتدن هر بری نقطه لازمه لرند دوند کد نصکره طوسطوغری حرکت
و کندی بار کیرلرینك باشی کندندن اول صف حربه داخل اولمش بولنان
نفر ك حیوانتك صغریسی حذا سینه کلد کده حیوانی بر آز ط-وبلا یوب
و حذایه دقت ایدر ك صف حربه داخل اولور لر .

اگر دونمك حرکتی تمامیه نقطه لازمه سنده اجرا ایدیلور واندن
صکره دخی طوسطوغری حرکت اولنور سه صف حربه داخل اولدقدن
صکره آرالق لرك دخی طوغری و صحیح اوله جنی طبیعیدر .

اشبو صف حرب حرکتده بار کیرلرك یکدیگر لرینه موازیله کوزل
بر حذا واستقامتده بولندیرلمری لازمدر .

سرعتلی یورویشلرینك انواعی

بو آنه دکین نفرات بار کیرلرینی عادنا یورویشیه سوق و اداره ایتکی
و بار کیر اوزرنده موازنترلرینی اولدقجه محافظه ایدر ك ایوجه اوطور منی
او کرمش اوله جقلرندن بعدما آنلره سرعتلی یورویشی کوستریلور عادنا
یورویشدن سرعتلی به کچمك ایچون معلم (آتلو سرعتلی - مارش) قومانداسنی
ایراد ایدر .

بو قومانداده نفرات وجودلرینك اوست قسمنك و اویاقلرینك وضعیتی

تبدیل ایتیمکسزین حیوانلرینی قولان بویینجه بر وایجابنه کوره برقاج دفعه بالديرلريله تضيق ايدرلر . و حیوانك حرکته سربسیت ویرمك ایچون دیزکینلرینی طوررکن عادتاً یوریتمك ده اولدینی کبی قویو ویررلر بارکیرلر سرعتلی یورویشنه کچدکلری کبی یومروق و بالديرلر حال اصلیلرینه کتوریلور .

اشبو سرعتلی یورویشی بارکیرك ایاقلرینك قطراً آتیلش-سندنطولایی حصوله کله جك ضربه ایله اوستنده کی نفری صجراتور و او طوره ق ایچون آتلونك وجودی اکره تماس ایتدیکی آنده پنه یکی برعکس ضربه تکرار قالدیرر والحاصل مساوی فاصله لر ایله وقوع بولمق اوزره سوارینك متعاقباً اینوب قالمسینی موجب اولور .

هر نقدر اشبو یورویشك عکس ضرباتی آتلونك بارکیر اوزرنده وضع و طوروشنی تصعیب ایدر ایسه ده نفرات کندولرینی قوتدن زیاده موازنتله طوته رق او طورمغه و عکس ضرباندنطولایی وجودك قسم اعلاسنك حرکاتنه یومروق لرك تبعیت ایتیبوب دائماً ثابت قاله بیلمسی ایچون دیرسسك مفصائی کرمکسزین کوشك والسیتی بولندیره رق عکس ضرباتی تخفیفه غیرت ایتلیدر .

بدایتده وزن وقراری آغیر بر سرعتلی یورویش استعمال اولنه رق بویورویشه او طوروشده ملکه حاصل اولدقدن صکر ه آتلو سرعتلی — مارش ه قومانداسی ویرلدیکی زمان دائماً اورته سرعتلی ایله حرکت اولنور . اشبو اورته سرعتلی یورویشيله دقیقه واحده ظرفنده (۳۰۰) خطوه مسافه قطع اولنور .

سرعتلی یورویشدن عادتیه کچمك لازم کلدکده معلم (آتلوعادتاً — مارش) قومانداسنی ویرر .

اخبار قومانداسنده آتلو حیوانك يورويشنى قيصالتقسزین بارکیرینی طوبلایوب
اجرا قومانداسنده عادتا یوررکن طورمق ایچون قوللانیلان یاردملری
قوللانهرق حیوانی عادناه کچورر .

✽ طوررکن سرعتلی یوریتک و سرعتلی یوررکن ✽

✽ طوردیرمق ✽

بونک ایچون (آتلو سرعتلی - مارش) قوماندالری ویریلور .
اجرا قومانداسنده نفرات طوررکن عادتا یوریتک و یوررکن سرعتلی
یورويشنه کچمک ایچون استعمال اولنان و سائطی بلا فاصله ویکدیگرینی
متعاقب و برآز دواملی اولمق اوزره اجرا ایدرلر .
سرعتلی یوررکن یکدن طورمق ایچون (آتلو - طور) قومانداسی
ویریلور .

بوقومانداده نفرات وجودك اغرلغنی برآز کیرویه ویردکن ماعدا
سرعتلیدن عادناه اینک وعادتادن طورمق ایچون استعمال اولنان یاردملری
بلا فاصله ویکدیگرینی متعاقب اجرا ایدرکن طوردیرملیدرلر . و طوردقن
صکره حیوانلرینی کیرویه طوغری یوریتماکه دقت ایتملیدر .
طوردقنصکره یومروق و بالیدرلر حال اصلیلرینه کتوریلور .

✽ سرعتلی یورويشنى اوزآلتق و قیصالتق ✽

سرعتلی یورويش واسطه سیله نفر بارکیر اوزرنده کوزل اوطوروشك
اصولانی برمقدار اوکرنده صکره انلرک اوطوروشنک متانتی دهـا زیاده
تحکیم ایچون اوزون سرعتلی تعلیم ایتدیریلور .

بونک ایچون دخی (اوزالت) قومانداسی اعطایا اولنورک، اشبو قوماندانک عقیبنده یومروقلر ثابت قالمق اوزره بالدرلرک تضییقی تزیید اولنورق اوزون سرعتلی به کچیلور .

اشبو یورویشک درجه سرعتی مسافله محافظه اولنق ودرت نعل یورویشنه کچلمامک شرطیله دقیقه واحده ظرفنده (۴۰۰) خطوه قدر ایصال اولنویلور .

اوزون سرعتلی ایله یوررلر ایکن ویریله جک اولان (قیصالت) قومانداسنده نفراک جله سی دیزکینلری طوبالمق واسطه سیله حیوانلرینی تدریجاً آلیقویهرق اورتی سرعتلی به کچوررلر .

اورتی سرعتلیده ایکن (قیصه سرعتلی — مارش) قومانداسی ویریلور ایسه هر نفر دیزکینلری طوبالایوب و بالدرلرینی یقین بولندیروب حیوانلرینی اورتی سرعتلیدن ده آخر یورویشه کچیروب طوبلو و قیصه اوله رق سرعتلی یوریدرلر .

اشبو یورویشده حیوانلرک عادنایه کچمامسنه دقت اولملیدر .
قیصه سرعتلی ایله یوررلرکن تکرار اورتی سرعتلی به کچورمک ایچون (اورتی سرعتلی — مارش) قومانداسیله نفرات تکرار اورتی سرعتلی به کچوریلور .

ایکسنجی وضعیتله یوریمک

بونک ایچون (بارکیرله صاغه ویا صوله — وضعیت الدیر) قومانداسی ویریلور .

بو قومانداده نفرات بارکیرک ایحطرفده کی کوزیله برونی اره سنده کی خطی جزئی مشاهده ایدم جک صورتده ایحطرفده کی دیزکینی طوبالار

والمحطرفده کی دیزکینک تاء ثیرینه حیوانک تبعیت ایدم بیللمسی ایچون طیش طرفده کی دیزکینی قوبووبرر .

بو حالده حیوانک قولاقلرینک یکدیگرندن آلچق اولماسنه دقت اولملیدر .

ایچروده بولنان بالدر قولان اوزرنده وطیش طرفده کی بالدر دخی قولامک درت برهق کیروسنده بولنوب بولنردن هرایکیسی صغرینک یانطرفه چیقمسینی منع اتمک و اوطوروش یاردمیه متحداً بارگیری بولندیفی وضعیتده طوتغه وایلر و طوغری یوریمک دقت اولملیدر .

وضعیت آلدیرلمش اولان طرفه ایچطرف و مخالفی طرفه طیش طرف تسمیه اولنور .

اشبو وضعیت هم طورر و همده یوررکن آلدیریلور .
نفراتک یا کاش اولهرق دائماً ایچ دیزکین اوزرنده یوریمکی عادت ایتمالری ایچون بو وضعیتله یورویشک مدتی پک آز اولملیدر .

❦ دأره اوزرنده حرکت ❦

نفرات خط مستقیم اوزرنده سرعتلی یورویشله اوطوروشده متانت کسب ایتدکدنصکره آنلر دأره اوزرنده یوریتدیریلور .

دأره اوزرنده تعلیمدن مقصد نفراتک بارگیر اوزرنده موازنترلرینی دهها زیاده تقویه ایلمک و دونمک و چرخ حرکتلرینه تهیه ایتمکدن عبارتدر .
دأره قبالی و آجیق مانژده رسم اولنسان یارم مانژلرک کوشه لرینک تدویر ایدملرندن حاصل اولان برشکلدر .

دائرمك يارم مانثر يوللرينه طوقندينى نقطه لره اساس نقطه لرى دىنوركه
بو حالده هر دائرمده درت اساس نقطه سى بولنور .

اگر اساس نقطه لرى اشارت اولنماش ايسه دائره لرى تماماً يارم
مانثر ايجروسنده بولنديره بيلمك ايجون (يارم مانثر - مارش) قومانداسيله
قول باشى مانثر ك ضلع كيرينك منتصف نقطه سندن مانثر ايجروسنه
دونديريله رك يارم مانثر داخلنده قطعه اولا برقاج دفعه حركت ايتديرلك
ايجاب ايدر .

بعده (دائره - مارش) قومانداسى ويريلور .

اشبو نهايتكى اجرا قومانداسنده قولباشى ايلك تصادف ايدى چكى
اساس نقطه سنده مانثر دن آريله رق باركيرينى دائره اوزرنده سوق ايتك
ايجون اولا بالديرلريله حيوانى كيرودن ايلرويه وديزكينلره طوغرى تضيق
ايدر . وايچ طرفده كى ديزكين باركيرى خط مستقيم دن آره رق دونديرلك
ايجون استعمال وعبنى طرفده كى بالديرلريله متحداً دوني لان منخنى بي
(دائرمى) بيولتمك اوزره تاثير ايتديريلور .

طيش طرفده كى ديزكين وبالدير ايسه دوني لان منخينك بيوكلكه كى
تحميد وباركيرى دائره خطندن خارجه چيقارمق اوزره تاثير ايتديريلور
ووجودك آغزالنى آزاجق ايچ قيناق اوزرينه ويريلور .
نفرات سائره قولباشينك دونديكى نقطه دن متعاقباً دونه رك آنك كى
حركت ايدرلر .

باركيرلر اوموز وصغريسنى دائره منخينسندن طيشارويه جيقه - ارجق
اولور ايسه اولطرفده كى ديزكين وبالديرى ده ايزياده تاثير ايتديرمليدر .
دائرمك مركزينه متوجه اولان يانه ايجطرف ومخالفى طرفه طيش طرف
تسميه اولنور .

دائره دن مائر اوزرينه كچلمك لازم كلكدكه قولباشى مائر ك كوچك بار كير يولنده كى اساس نقطه سنه كلز دن اول (تام مائر) قومانداسى وبريلور .

بو حالده هر نفر محل مذكوره ايچ طرفده كى ياردملر ك تاثيرلر يى تذيب ايدر ك بار كير يى طيشارويه طوغرى تضيق وبالدير ايله ديز كينلر اراسنه الهرق خط مستقيم اوزرينه سوق ايدر وبار كير يولنه كيروب مائر ده حر ك ايدر لر .

❦ دائره دكيشدير مك ❦

نفرات مائر ك بر نصفنده دائره اوزرنده بالاده ذكر اولندينى كى حر ك ايتمكده لر ايكن آنلرى مائر ك نصف ديكرينه كچيروب اولطرفده دائره چويرتمك مراد ايدلدكه (دائره - دكيشدير) قومانداسى وبريلور .
 بو قومانداده قولباشى ضلع كير اوزرنده بولنان اساس نقطه سندن ومائر ك مركزندن كچر ك مقابلى بولنان ضلع كير اوزرنده كى اساس نقطه سنه كيدر . ووجهته كى نصف مائر داخلنده دائره يى رسم ايدوب اوزرنده حر ك ايدر .

نفرات سائر قولباشى يى تعقيب و آنك كى اجراى حر ك ايدر لر .
 مائر ك مركزنده حيوانلر ك وضعيتى تبديل ايديلوب يكي دن رسم اولنه جق دائره طرفه ايكنجى وضعيت آلديريلور .

بو خصوصده اسكى ايحطارفده اولان ياردملر ك تاثيرلر يى ك تنقيصى يكي اولان ايحطارف ياردملر ك تاثيرلر يى ك تربيدى نسبتنده اولمليدر .

دائرة کوچولمك

دائرة کوچولمك حرکتی نفراتی چرخ حرکتلرینه آلدیرمق ایچون بر مقدمه در بونك ایچون (دائرة ب کوچولت) قومانداسی ویریلور . بوقومانداده نفرات طیش طرف یاردیملرینی دها زیاده تأثیرایتدیره رکدن حیوانلرینی دائره نك محیطندن مرکزینه طوغری سوق ایدرك ارالرنده کی مسافه لری بر خطویه قدر کوچولتورلر .

دائرة کوچولتیلوبده صره بعدینه یناشمش ایکن آتلور یورویشلرینه خال کله جك بر حال مشاهده ایدرلر ایسه مسافه سنی بولنجیه قدر حیوانه آلدیرمش اولدینی وضعیتی ووجودینك دائره یه کوره اولان انحناسنی بوزمق سزین حیوانی اوکنده کی حیوانك طیش طرفده کی قالچه سی استقامتمنده سوق ایدر و مسافه سنی آلدقده ینه اولکی کی تعقیب ایدر .

دائرة بیولمك

بونك ایچون (دائرة - بیولت) قومانداسی ویریلور . بوقومانداده نفرات تدریجاً ایچطرف یاردملرینك تأثیرلرینی تذید ایدرك هر بردورده دائره نك قطرینی برالی ایکی خطوه قدر تزید ایتمك اوزره یارم مانر داخلنده رسم اولنسان بیوك دائره یه داخل اولوب بیوك دائره اوزرنده یکدیگرینی آلتیشر خطوهایله تعقیب وحرکت ایدرلر .

چرخ حرکتی

آتلونك بارکیرینه مانرك ایچروسنه طوغری رسمایتدیردیکی دائره یه چرخ تعمیر اولنور .

چرخ — بارکیرك بارکیر یولندن آیرلاینی نقطه دن باشلیوب تکرار اونقطه ده نهایتلیملی. حرکت مذکور ایچون (چرخ — مارش) قومانداسی ویریلور . اجرا قومانداسنده هر بر نفر بارکیرینه ایچطرفه طوغری ایکنجی وضعیتی آدیروب قطری آلتی خطوه دن (ایکی بارکیر بوی) عبارت بدائرہ چویرتور و دائرہ نك ختامنده بارکیر یولنه کیروب اوکنه طوغری حرکت ویکدیگرلرینی تعقیب ایدرلر .

کیرویه چرخ حرکتی

کیرویه چرخ حرکتی چرخ منلوق قطری آلتی خطوه دن عبارت بر نصف دائرہ ایله بداء وبرا کر یلک ایله نهایت بولور بر حرکتدن عبارتدر . بونک ایچون (کیری چرخ — مارش) قومانداسی ویریلور . مارش قومانداسنده چرخ ایتک حقنده بیان اولنان قواعدی عینله اجرا ایدرک نصف دائرہ یی رسم ایتدکنصکره هر نفر بارکیرینی مانثر یولندن آیردینی نقطه نك طقوز خطوه مقصداری کیروسنده بولنان نقطه یه توجیه ومانلا سوق ایدر . اورایه واصل اولدقده تبدیل یان ایدوب عکس یان ایله یوریمکه باشلارکه بو حرکتک اجرا سندنصکره کندوسنک کیروسنده بولنان نفری ایلروسنده بولور .

تنبیه — تعلیمک ابتدالرنده کرک چرخ و کرک کیرویه چرخ حرکتلرنده عجمی نفراتک دائرہ لری منتظم و مساوی رسم ایتلرندن و بر آنده بارکیر یولنه واصل اولملرندن زیاده حیوانلرینی ایوسوق و اداره ایچون ایجاب ایدن یاردملری طوغری اوله رق استعمال ایتلرینه ودها صکره لری دائرہ حرکتنه هپ بردن باشلیوب هپ بردن بارکیر یولنه کیرمکله و دائرہ لرینک

عینی بیوکلاکده اولمسی ایچون یورویش وزن وقرارینک محافظه سنه وکیرویه
چرخ حرکتلرنده مائلاً تعقیب ایده جککری خطلرک یکدیگرینه موازی
اولسنه دقت ایتملیدرلر .

➤ یرنده دونشلر ➤

اوک و آرد واورته قسم اوزرنده اولمق شرطیه اوج نوع دونش
واردر .

➤ { ۱ } اوک قسم اوزرنده دونش ➤

اوک قسم اوزرنده دونمکده مرکز نقطه سی بارکیرک اوک ایاقلری
آراسینده بولنورکه دونمک حرکتی تمام اولنجیه قدر دونشه نظراً ایچ
طرفده کی اوک ایاق کیرو وطیش طرفده کی اوک ایاق ایلرو کیتمک اوزره
قیصه قیصه خطوه لرله مذکور نقطه اطرافنده دوندریلور .

آرد ایاقلری ایسه اوک ایاقلردن اولان اوزاققلری نصف قطر اعتباریه
واپچ طرفده کی آرد ایاق دائماً طیش طرفده کی آرد ایاق اوکینه وضع
اولمق اوزره اوک ایاقلر اطرافنده برقوس رسم ایدرلر .

دونمک ایچون (اوک قسم اوزرنده صاغه) صوله (یاخود صاغه کیری
(صوله کیری) — دون مارش) قوماندالری ویریلور .

اخبار قومانداسنده بارکیره صاغه دونمک ایچون صاغه وصوله دونمک
ایچون وصوله ایکنجی وضعیت آلدیرلملیدر . اجرا قومانداسنده ایچ بالدر
بارکیرک آرد قسمی اوک قسم اطرافنده خطوه بخطوه حرکت ایتدیرمیه جک
صورتمده اجری تأثیر و تضییق ایدر . طیش بالدر ایسه آرد قسمک عجله
حرکت ایتمسی منع ایتمک اوزره قولانک کیروسنده بولندیریلور .

اشبو دونمک حرکتنده ایچ دیرکینی جککیرک بارکیری دوندیرمامکه دقت

ایتملیدر . حرکت ختام بولدقدنصکره دیزکین وبالیدرلر ایله بارکیر تکرار طوغری وایلوب ثابت طوتیلور .

❦ { ۲ } ❦ آرد قسم اوزرنده دونش

آرد قسم اوزرنده دونشده بارکیرك آرد قسمی ممکن مرتبه یرنده ثابت طومتق ایچون بارکیری بالیدرلر واسطه سیله دیزکینلره طوغری تضیق ایتملیدر . اشبو دونمك حرکتنده رسم اولان قوسلرک مرکز نقطه لری بارکیرك آرد ایاقلرینك اراسینده بولنوب آرد ایاقلری نقطه مذکوره اطرافنده ویکدیگرندن اولان اوزاققلرلری قطر اولق شرطیله برقوس اوزرنده ایچ طرفده کی آرد ایاق کیرویه وطیش طرفده کی آرد ایاق ایلرویه طوغری قیصه قیصه خطوله لر ایله دونمك حرکتی ختام بولنجه یه قدر دور ایدرلر . اوک ایاقلر ایسه آرد ایاقلردن اولان اوزاققلرلری نصف قطر اولق شرطیله برقوس رسم ایدرلر .

آرد قسم اوزرنده دونمك ایچون صاغه (صوله) یا خود صاغه کیری (صوله کیری) - دون - مارش (قوماندالری ویریلور .

اخبار قومانداسینده بارکیره دونیله جـك طرفه ایکنجی وضعیت آلدیریلور .

اجرا قومانداسینده بارکیری بالیدرلر واسطه سیله دیزکینلره طوغری تضیق ایدوب بعده حیوانك اوک ایاقلرینی مرکز اطرافنده خطوه بخطوه سوق وتحریرك ایتدیره بیله جـك صورتده ایچ دیزکین و آرد قسمك ثابت قاله بیلمسی ایچون دخی طیش بالدر تا یرایتدیلور که طیش بالدرک تا یریری

ایچ دیزکینه نسبة زیادہ اولق کرکدر . حرکتک ختامنده بارکیر
طوغرولتیلوب ثابت طوتیلور .

﴿ ۳ ﴾ اورتہ قسم اوزرنده دونش

اورتہ قسم اوزرنده دونمک حرکتکده مرکز نقطہ سی تخمیناً قولانک
التندہ بوانوب اوک و آرد ایاقلر یکدیگرینک عکسی طرفہ دور و حرکت
ایدرلر .

بونک ایچون (اورتہ قسم اوزرنده صاغہ (صولہ) یاخود صاغہ کیری
(صولہ کیری) — دون — مارش) قوماندالری ویریلور .

اخبار قومانداسنده دونیلہ چک طرفہ ایکنجی وضعیت آدیریلور .
اجرا قومانداسنده بارکیر دیزکینلرہ طوغری بالدرلر واسطہ سبیلہ
تضییق اولنوب دیزکینلر آرد قسم اوزرنده دونمک حقندہ وبالدرلر ایسہ
اوک قسم اوزرنده دونمک بختندہ بیان اولندینی اوزرہ تائیر ایتدیریلہ رک
حیوانک اوک قسمی ایچطرفہ و آرد قسمی طیش طرفہ طوغری تحریک
ایتدیریلہ رک اجرای حرکت ایدیلور .

حرکتک ختامنده بارکیر طوغرولتیلوب ثابت طوتیلور .

﴿ ۴ ﴾ کیر و یوروتمک

کیر و یوروتمک ایچون (آتلو کیری — مارش) قومانداسی ویریلور .
اجرا قومانداسنده بالدرلر یقین طوتیلوب وضعیت بوزلمق سزین دیزکینلر
تدریجاً طوبالانور .

دیزکینلرک طوبالانمسندن طولای بارکیر باشنی کیرویہ طوبالارکن بومروقلر

وضعیت اصلیه لرینه کتوریلور و تکرار بووجهله تاثیر ایتدیریلرک خطوه بخطوه کیرو یوریدیلور .

بارکیک کیره یوریمسندن طولای آتلو وجودینک ایلرویه میل ایتامسنه و حیواننک صغریسنی یا نطرفلره چیقار مامسنه و بارکیکینخی حنبلی اوستنه طیاندر مامق ایچون دیزکیکلرک مدت مدیده مؤثر برحاله بولنامسنه دقت ایتلیدر .

اگر بارکیک کیرو یوریمک خصوصنده مخالفت کوسترایسه برقاچ خطوه ایلرو یوریملی و یا خود صغریسنی تحریک ایچون بالدرلردن بریخی طیبوب بارکیک صغریسنک اشبو حرکتدن بالاسه تفاده درعقب دیزکیکلری تاثیر ایتدیره رک حیوانی کیرو یوریمکه غیرت ایتلیدر .

کیرو یورینورکن یا (طور) و یا (ایلری - مارش) قوماندالری ویریلور .

طور قومانداسی ویرلدکه نفرات حیوانلرینی کیرو یوروتمکدن وازچرلر و بالدرلرینک تضییقهله بارکیکلرینی کیرو یوریمکدن آلیقویهرق طور دیرلر . (ایلری - مارش) قومانداسی ویرلدکه دیزکیکلر برآز قویو ویریبوب بالدرلرک تاثیر دخی حیوانی اول امرده طور دیره جق وبعده ایلرویه یوروته جک درجهده اولملیدر .

✿ یناشمق حرکتی ✿

جههیی بوزمقسزین بارکیک یا نطرفه یوریمسنه یناشمق دینور . بونده دخی حیوانلر طیش طرفده کی یان ایاقلرینی ایچطرفده کی یان ایاقلرینک اوزرندن چاراز واری آشیره رق یوررلر .

حرکت مذکور هم طورر و همده یوررکن اجرا اولنه بیلور .
اگر آتلور مانژده صاغانله طورر مقده لر ایسه او حالده تعلیمچی (آتلو
صاغه یناش - مارش) قومانداسنی ویرر .

اخبار قومانداسنده بالجهله آتلور دیزکینلر علی الخصوص طیش
دیزکین ایله بارکیرک اوک قسمنی ثابت طوتوب وعینی زمانده طیش بالدیری
قولانک کیروسنه تأثیر ایتدیره رک اوک قسم اوزرنده صوله دونمکده
اولدینی کی بارکیرلرینی مانژ یولنه عمودی بروضعیته کتورنجهیه قدر بارکیرک
آرد قسمنی ایجرویه طوغری دوندیرلر . بعده نفرات یناشیله جق جهته
(صاغه) طوغری حیوانلرینه ایکنجهی وضعیت آلدیرلر . وکندولری
دخی صاغه بقارلر .

مارش - قومانداسنده بالدیرلر تأثیر ایتدیریلوب بارکیرلر دیزکینلره
طوغری تضیق ایدیلور . او آنده صاغ یومروق صاغه دونشده اولدینی
کی تأثیر ایتدیریلور . بو حالده حیوان صاغ طرفه دونمک ایستر عینی
زمانده صول یومروغک طولانی ایسه اوک قسمک دونمسی منع ایدر .
بوزمانده قولانک کیروسنده بولنان طیش بالدیرک تضیقی حیوانی یان طرفه
حرکته مجبور ایدر .

حیوانک آخر برون وقرار ایله خطوه بخطوه یانه کیتمسی ایچون
دیزکین وبالدر یاردملری لزوم وایجابنه کوره تکرار ایدیلور . صوله
یناشمق دخی بونک عینی فقط عکسی یاردملرک تأثیریه اجرا ایدیلور .
یوررکن یناشمق حرکتی یالکز عادنا یورویشنده ایکن یاپیلور . بونک
ایچون ینه عینی وجهله قوماندا ویریلور . فقط حیوانلر قوماندانک اخبار
قسمنده عمودی رضعیته کتیرلمیوب حرکتلرینه دوام ایتدیریلورلر . اجرا

قسمی ایراد اولندینی زمان همان عمودی وضعیته کتیرلمکله برابر یناشمغه باشلانور .

یناشمق حرکتته ختام ویرمک ایچون (طور) قومانداسی ویریلور ایسه اوحالده هر بر آتلو دیزکینلر ایله بارکیرک اوک قسمی یناشدیرمقدن آلیقویوب ایچ بالدير دخی صغیرینک حرکتی منع ایدر . وهرایکی بالديرک تاثیريله حیوانی مانثر یولنه عمود بروضعیتده طورديرلر .

یناشمق حرکتی اجرا اولنورکن تکرار طوغری یوروتمک مراد اولنور ایسه اوحالده (ای - لری) قومانداسی ویریلورکه بوده یالکز یناشیلان طرفه طوغری اجرا اولنور . بوقومانداده ایچدیزکین وسطه سیله بارکیرک اوک قسمی مانثر یولندن آیروب آرد قسمک بولندینی خط اوزرینه سوق ایتملی . وبوجمله بارکیری طوغرولندقدنصکره بالديرلرک تضییقه حیوانی مانثر یولنه سوق ایدوب یکدیگرینی تعقیب ایدرک حرکت ایدرلر .

تنبيه - اگر بارکیر سوارینک یاردملرینک تاثیرینی بکلمکمیزین سریع اوله رق یناشیلان یانه حرکت ایدر ایسه بوکا (بالديردن قاجق) تسمیه اولنورکه بوسی حیوانلرده طیش دیزکین وایچ بالدير قوتلیجه تاثیر ایتدیریلرک حرکت تنظیم ایدیلور .

اگر بارکیر یناشورکن بارکیر یولندن آیریلوب کیرویه قچارایسه بوقصور یادیزکینلرک لزومندن زیاده ویاخود بالديرلرک لزومندن آز تاثیر ایتدیرلمسندن ایلر وکلور .

اگر بارکیر اوک قسمی دها سریع اوله رق کتوررسه طیش دیزکین واسطه سیله اوک قسمی آلیقویملی و طیش بالديرلرک تاثیرینی تزیدایتملیدر .

اگر بارگیر آرد قسمی اولك قسمندن دها سریع اوله ق کتوررسه
 او حالده ایچ دیزکین دوندیر مکده اولدینی کبی تاثیر ایتدیریلور . وعینی زمانده
 ایچ بالدر زیاده جه تاثیر ایتدیریلوب صغرینك حرکتی تنظیم قلدور .
 یناشورکن نفرات وجودك اغزلغنی ایچ قیناق اوزرینه ویرملیدر
 یناشیلان جهته ایچ طرف ومخالفته طیش طرف تسمیه قلدور .

❦ صره بعدیله یوریمك ❦

اشبو حرکت قطعه یوریبور ایسه یابولنیلان یورویشله ویاخود
 بولنیلان یورویشدن زیاده بریورویشله اجرا ایتدیریلور . برنجی حاله کوره
 اکر قطعه عادتاً ویاخود سرعتلی یورویشله یوریبورسه او حالده (صره بعدینه
 یناش - مارش) قومانداسی ویریلوب عقببنده (قولباشی - طور) ویاخود
 (قولباشی - عادتاً) مارش قوماندالری ویریلور که قولباشی یاطورر ویاخود
 عادتاً یورویشنه اینر وهر برنفر کندو اوکننده بولنان نفره برخطوه
 یناشد قده اودخی حیوانی طور دیرر . ویاخود عادتاً یورویشنه کچیرر .
 ایکنجی حاله کوره یعنی اکر قطعه عادتاً ویاخود سرعتلی ایله یوررکن
 (صره بعدینه یناش سرعتلی ویاخود درت نعل - مارش) قوماندالری
 ویریلور که بو حالده قولباشیدن ماعداسی قومانداده اشعار اولنان یورویشله
 یوریبوب هر نفر اوکننده کنه برخطوه قالنجهیه قدر یناشور .

اگر صره بعدیله یوریبیان قطعه نفراتنه ایلرودن مسافه آلدیرمق
 (ایکی بارگیر بوی مسافه ایله یوروتمك) مراد اولنورسه او حالده (ایلرودن
 مسافه آل سرعتلی ویاخود درت نعل - مارش) قوماندالری ویریلور .
 اجرا قومانداسنده هر بر آتلو کندو اوکننده بولنان آتلونك کندوسندن

ایکی بار کبر بوی اوزاقلشدیغنی کوردکده قومانداده اشعار اولنان یورویشله
حیوانی یوریدر .

❦ درت نعل ❦

آتلولر عادتاً و سرعتلی یورویشلریله موازنتی غائب ایتیمه رک حیوان
اوزرنده اوطور مقده اقتدار پیدا ایتدکرنده درت نعل یورویشنه کچیریلور .
درت نعل یورویشی بر برینی متعاقب بر طاقم صچرایشلردن حاصل اولمغله
بك نظرده دیگر یورویشلردن تفریق اولنور . حیوانلرک ایاق آتشلرینه
نظراً درت نعل یورویشی اوج نوعه تقسیم اولنور .

اگر حیوان صاغ یان ایاقلریله صول یان ایاقلرینی تجـاوز ایدرک یورر
ایسه اکا (صاغیانیه) واکر صول یان ایاقلریله صاغ یان ایاقلرینی تجـاوز ایدرک
کیدرسه اکا دخی (صولیانیه) یور یور دینور که صاغ یانله یورونلدیکی ویا صاغه
دونلدیکی زمان حیوان صاغ یانله وصول یانله یورونلدیکی ویا صوله دونلدیکی
وقت حیوان صول یانله یورر بولنور سه او حالده بونوع درت نعلره (طوضری
درت نعل) تعبیر اولنور . واکر اوک ایاقلریله صاغ یانله و آرد ایاقلریله
صول یانله ویا خود اوک ایاقلریله صول یانله و آرد ایاقلریله صاغ یانله یورر
بولنور سه اومثللو درت نعله دخی (بوزوق درت نعل) دینلور .

وماثرده صاغ یانله یورونلدیکی ویا صاغه دونلدیکی حالده صول یانله
وصول یان ایله یورونلدیکی ویا خود صوله دونلدیکی حالده صاغیانله یوررسه
اکا دخی (یاکلش درت نعل) یور یور دینور .

کـرک یاکلش و کرک بوزوق درت نعل یورویشلریله حیوانک کوشه لردن
کچرکن موازنتی غائب ایدرک دوشمسی و سریع حرکتلر اشناسنده آرد

ایاقلریله اوک آیاقلرینه چارمسی ملحوظ بولندیغندن بونوع یورویشلر خطالی و مخاطره لیدر .

درت نعل یورویشیله یوریان بر حیوانک اوزرنده بولنان آتلو بارکیرینک قننی یان ایله یوریدیکنی اکیلوب حیواننک ایاقلرینه باقمسزین اکلایه بیلور . شویله که اگر نفرک بتون صاعطرفی ایلرویه طوغری کیدر وصول قیناغی صاغ قیناغه نسبتله دهها زیاده عکس ضربه یه دوچار اولور و صاغ بجانغی صول بجاقدن دهها زیاده صاللانورایسه او حالده صاغیانله و عکسی حس اولنورسه صول یانله درت نعل یوریدیکنه حکم اولنور .

آتلولر عادتاً ویا قیصه سرعتلی یوردلرکن آنلری درت نعل یورویشینه کچیرمک مراد اولنورسه معلم اول امرده (درت نعل ایچون وضعیت آل) اخبارینی ویرر . بواخبارده نفرات قننی یانله یوریورلر ایسه حیوانلرینه اوطرفه طوغری ایکنجی وضعیتی آلدیرلر .

بعده (آتلو درت نعل - مارش) قومانداسنی ویرر .

اجرا قومانداسنده نفرات بالدرلرینی تأثیر ایتدیره رک حیوانلری دیزکینلره طوغری سوق ایدر والارک سرجه پرمقلری طیش مایه طوغری کتوریلره رک بالدرلر دخی عادتادن سرعتلی یه کچمکده اولدینی کبی تا" یرایتدیریلور . بعده طیش دیزکینک خفیفجه برایی کیره ایچ مایه طوغری چکلمسی وعینی زمانده ایچ بالدرک تا" یری بارکیرک طوغری درت نعل یورویشینه کچمسنی موجب اولور .

حالبوکه بارکیره الیرلمش اولان وضعیت سببیه ایچ ایاقلری طیش ایاقلرینی متجاوز بولندیغندن صچرا یوب باصدینی وقتده دخی ایاقلر بو وضعیتده بولنورلر و بناءً علیه درت نعل طوغرو اولور .

سواری بارکیزك صچرامق اوزره اوک قسمنی قالدیرمقدمه اولدیغنی حس
ایتدکده دیزکینلرایله برمقدار سربسیت ویرر و حیوان درت نعل یوروشنه
کچدکده ایستنین وزن وقرارد درت نعل یوروتمک اوزره دیزکینلر
طوبلانور .

بارکیر درت نعل ایله حرکت ایتدیکی مدت سواری قیناقلرینک بارکیرک
ارقه سندن ایرلاماسنه ووجودینک اوست قسمنک ایلرویه وکیرویه
صالانماسنه وطوغری وصقینتیسز اوله رق بارکیرک حرکتنه متابعت ایتمک
اوزره ساکن اوطورمغه دقت واعتنا ایتلیدر .

درت نعل یوروشندن سرعتلی وعادتا به اینک ایچون (آتوسرعتلی
ویا خود عادتا — مارش) قوماندالری ویریلور .

اخبارده هر بر آتلو اویلقلری واسطه سیله اوطوروشنی تحکیم ایدوب
اجرا قومانداسنده وجودینک آغزلفنی برمقدار کیرویه ویره رک بالدرلر
یقین طوتلمش اولدیغنی حالده دیزکینلری طوبلار و حیوانی عادتا ویا
سرعتلی به کچورر .

اگر بالاده بیان اولنان یارملر تکرار اولنوبده حیوان عادتا ویاسرعتلی به
ایتمزسه او حالده طیش دیزکین و بالدری تأثیر ایتدیروب یوروشنی بوزمغه
وبوندن استفاده ایدوب دیزکینلری طوبلایه رق مطلوب اولان یوروشه
ایندیرمکه غیرت ایتلیدر .

اگر نفر بارکیرینک یاکلش درت نعل یوریدیکنی حس ایدر ایسه
همان عادتا یوروشنه کچروب تکرار وضعیت آلدیره رق طوغری درت نعل
قالدیرمسی ایجاب ایدر . ویا خود طیش دیزکین و بالدری زیاده جه تأثیر
ایتدیروب حیوانک آغنی دکیشدیرتمکه غیرت ایدر .

ایک نجی قسم

اگر اوزرندہ وضع وطوروش

شمدی بہ قدر تعریف واجرا ایدیلان حرکات واسطہ سہیلہ نفرات
چول اوزرندہ لایقہ اوطورمنی و حیوانرینی قنطارمہ ایلہ سوق وادارہ
ایدہ بیلہ کی اوکرمنش اولہ جقہ لرندن بوندن صکرہ اگر اوزرندہ تعلیمہ
کچیریلور . آتلونک اگر اوزرندہ کی اوطورہ جنی محل چول اوزرندہ
اوطوردینی محلك عینی اولہ جقہ صورتہ حیوانہ اگر وضع اولنمزشہ
بالاخرہ برطاقم محاذیر حصولہ کلہ بیلور . شویلہ کہ :

اگر زیادہ ایلروہ اورولمش ایسہ سوارینک آغرانی بارکیرک اولک
قوللری اوزرینہ بینہ جکندن سواری بارکیرینی موازنندہ طوتہ میہ جنی کبی
مذکور حیوانک آرد قسمی آرزوسنہ موافق صورتہ سوق و تحریکدہ
صعوبت چکر .

اگر زیادہ کیروہ اورولمش بولنورسہ اوحالہ سوارینک آغرانی
بارکیرک صرتنک اک ضعیف محلنہ و آرد قوللری اوزرینہ بینہ جکی صکی
قولان دخی قارننک یومشاق برینہ تصادف ایدرکہ بوندہ دہ بالدیاریدملری
زیادہ سہیلہ کیروہ تاثر ایدہ جکندن سوق و تحریک خطالی اولور .
اگر اوزرندہ اوطوروش قواعدی چول اوزرندہ اولدینی کییدر .

اگر وقتدارمه اورولمش ايكن آته بنك ويره اينك

بونك ايجون (صاييله آت بنكه حاضر اول) (بر) (ايكي) قوماندالري
ويريلور .

بر وايكي حركتارينك اجراسي طبق چول اوزرنده اولديني كي اولوب
فضله اوله رق ايكي قومانداسنده ياييله جق حركتك نهايتنده سـ وارينك
وجودي طوسطوغري اولديني حالدہ صول بجاغني قالچہ دن آيروب ديزني
بوكر وصول اياغني اوکچہ سي اشاغني اولمق اوزره اوزنكي يه صوقار .
(ايجاب ايتديكي تقديرده صاغ الي ايله دخی ياردم ايدر) .

وصول ديزينك ايج يوزيني اكره صيقيجه ياپشديروب اياغك بروني
حيوانه طوقماق ايجون ايلرويه طوغري چوريلور . وصاغ الاك باش برمني
اكرك اوطوريله جني طرفه اوزادلمش وديكر درت برمقلى متصل اولديني
حالدہ اكرك آرد خانه سنك صاغ طرفدن قاورامش وصاغ اياغك اوکچہ سي
دخی يردن قالديرلمش اولديني حالدہ وجود طوغري وصقيتيسنر اولمق
وكوزلر قالمق اوستندن ايلرويه باقمق اوزره (آت) قومانداسني بكار .

بو قومانداده آتلو صاغ اياغك اوزرنده صچرايوب وصول اياق ايله
اوزنكي يه باصه رق طوسطوغري وباركيره عموداً كندوسني چكر بو حالدہ
بل چيقورلتلمش وكووده قوللر اوزرينه استناد ايدوب اكرك قايماسيچون
جزئي ايلرويه اكيلمش قوللر كر كين وبجـ اقلري آپش اراسندن اعتباراً
اوکچہ يه قدر بربرينه ييتيشك وديزلر قوتايجه اكره طيانش بولنور بعده
(بين) قومانداسي ويريلور .

بو قومانداده طبق چول ايله تعليمده اولديني كي صاغ بجاغني قالد يروب
اكرك آرد خانه سي اوزرندن آشيره جني آنده صاغ ال آرد خانه يي ترك ايدر

و باش پرمق اوك خانه نك اورتہ سہنہ و دیکر پرمقصر صاغہ و اشاغی بہ اوزادلمش اولمق اوزرہ وضع ایدیلوب خفیفجہ اگر اوزرینہ اوطورر .
وصاغ ایاغنک برونی ایلہ خفیفجہ صاغ طرفدہ کی اوزنکی نك کیروده کی قولنہ اورہ رق کیروده کی قولی ایچ طرفہ و اوکده کی قولی طیش طرفہ جو یروب ایاغنی اکیلوب باقمسزین اوزنکی بہ صوقار . دیزکینلر بالادہ کی اصول اوزرہ طوتیلور سہدہ یومروقلر اکرک اوك قاشنہ طوقنماق شرطیلہ بقین بولندیریلور .

یرہ اینمک

یرہ اینمک آتہ بینمک عینی و فقط عکسی اولمق اوزرہ اجرا اولنور .
(صایی ایلہ یرہ اینمک حاضر اول) قومانداسندہ نفرات طبقی چول اوزرندہ اولدینی کبی صول ال ایلہ یلہ دن طوتارلر .
وصاغ الینی آتہ بنمکدہ اولدینی کبی اکرک اوك خانه سنہ وضع ایدرلر .
صاغ ایاق اوزنکیدن چیقاریلوب وصول ایاقلہ اوزنکی یہ قوتلیجہ باصیلوب وجود ایلری طوغری چویرلمش اولدینی حالده قولار اوزرینہ قالقیلہ رق (یرہ) قومانداسی بکلنور .

بو قوماندادہ صاغ بجاق چول ایلہ تعلیمدہ اولدینی کبی صغری اوزرندن آشیریلہ رق صول بجاغک یاننہ کتوریلہ جکی صرہدہ صاغ ال اکرک اوك خانه سنی ترک ایدوب آرد خانه سنہ کتوریلور . و طبقی یوریدہ بیسان اولندینی کبی طوتیلور .

(این) قومانداسندہ صاغ بجاق آغرا اشاغی بہ ایندیریلہ رک صاغ ایاغنک ثلث اولی ایلہ یرہ باصیلور . وصول ایاق دخی اوزنکیدن چیقاریلوب صاغ ایاغک یاننہ وضع ایدیلور .

(بر) و (ایکی حرکتلی ایسه طبقی چولده اولدینی کبی یاییلور

اوزنکیلرک اوزونلغی وایاغک اوزنکیده ❦

❦ وضع و طوروشی ❦

اوزنکیلرک اوزون ویا قیصه اولمیوب تماماً نسبتنده اولمیچون آتلو
اگر اوزرینه منتظماً اوطور ویده بجاقلرینی طبیعتیه صار قتمش اولدینی حالده
اوزنکی طبائتک اوچه دیکیشدن اوج سانیتمتره یوقاریده بولنمی ایجاب ایدر ،
بو حالده اوزنکیلره استناداً قالقیله جق اولورسه آپیش اراسیه قالطاق
آراسنده بریومروق صیقه جق قدر بر بوشلق بولمایدیر . زاخمه قایشنک
بار کیره متوجه اولان یوزی ایلری و اوزنکینک ایلرو کلان قولی ایسه طیش
طرفه کیمک اوزره اوزنکیلر ایاغه طاقیلور و اوزنکی به یالکز بالدیرک آغزانی
تحمیل اولنوب اوچه ایاغک برونندن آلق اولق اوزره ایاغک ثلث اولی
یعنی ایاقلرک کوچک یرمقلری نهایته قدر اوزنکی به صوقیلور .

اگر آتلو اوزنکیلره زیاده طیانور ایسه اوطوروشیه بالدیرلرینک
وضعیتلرینی بوزار و بالدیرلرینی ایجابی وجهله تائیرایتدیرمکده کوچک چکر .
اگر آتلو ایاقلرینی لزومندن آز صوقار ایسه جزئی بر حرکتله
وقولایقله اوزنکیلر ایاقدن فیرلار اگر زیاده صوقار ایسه هم بالدیرلرینی
همده اوچه لرینی اشاعیده طوته مز .

زاخمه قایشلری یکی ویاش اولدقلری حالده آتله بنمک ویره اینمکده
صول زاخمه قایشلری مرور زمانله اوزایه جفتدن اره صره زاخمه قایشلرینی
یکدیگر یله تبدیل ایتک اقتضا ایدر .

❦ انگیز سرعتلیسی ❦

اوزون بر مسافه قطع اولنه جفی وقت هم آتلویه و همده حیوانه سهولت

اولق اوزره انکلیز سرعتلیسی استعمال اولمایدیر . (انکلیز سرعتلیسی)
 اخباری ویرلده نفرات وضعیتلرینی تبدیل و تغییر ایتکمیزین فقط
 بمقدار اولق و دیزلریله اگری قاورامش و برآزده اوزنکیلره طیماش
 اولدینی حالد تصادف ایدجکی عکس ضربدن برینه تبعیت ایله قیناقلرینی
 قاطماقدن قالدیروب حصوله کله جک ایکنجی عکس ضربینی اکره
 اوطوره قسزین هواده کچیردکنصکره اوچنجی عکس ضربه اجرا اولمزدن
 اول اکر اوزرینه اوطورر و مذکور عکس ضربیه اتباعاًینه قالقار والحاصل
 آتلو دائماً هرایی عکس ضربه نک بریسندن اجتناب ایتک اوزره حرکتیه
 دوام ایدر .

اگر آتلو درجه کفایده قالمز ایسه تصادف ایتماسی لازمکلان
 عکس ضربینی هواده کچورمکسزین اکره اوطوره جفندن هم حرکت لایقوله
 یا بلعاش اولور و همده یورویشک وزن و قراری بوزلمش اولور اکر
 لزومندن فضله قالفه جق اولور ایسه هم حرکتلر چرکین و همده اوچنجی
 عکس ضربه نک اجرا سندن اول اکره اوطوره مامش اولور .

اشبو حرکت منتظم سرعتی یوریان حیوانلر اوزرینه بینلمش اولدینی
 حالد اجرا اولنه ییلور .

والحاصل رهوان وجبه و قره اشکین یوریسان حیوانلر ایله اجرایی
 ممکن دکلدر .

کم و قنطارمه دیرکینلرینک برلکده ملو تلمسی

نفرات قنطارمه دیرکینلریله حیوانلرینی سوق و تحریکده ملکه و مهارت
 کسب ایتدکنصکره کم ایله تعلیمه باشلاتدیریلور .

کم و قنطارمه دیرکینلری برالد بروجه آتی طوتیلور . شویله : آتلو

صول الينك دردنجي پرمغنى كم ديزكىنلرينك آراسنه صوقوب اوچلرغى شهادت پرمغنىك اورتە بوکومی اوزرندن چيقارەرق حيوانك صاغ اوموزينه طوغرى صارقيدر . قنطارمه ديزكىنلرينك اورتە سنى كم ديزكىنلرى اوزرينه قویار بو حالده نفر يومروغنى قيايوب باش پرمغنى جزئى بوکوك اوله رق شهادت پرمغنىك اورتە بوکومی اوزرندن كچن ديزكىنلر اوزرينه وضع ايدر . كم ديزكىنلرينك سوركىسى دخىال ايچنده و دردنجى برمق اوزرنده طوتيلور . كم ديزكىنلرى ديزكىن خلقه لرندن تا يومروغە قدر قنطارمه ديزكىنلرينك ايچطرفنده بولنور . وقنطارمه ديزكىنلرى ايسه طيش طرفدن اشاغى به طوغرى صارقيق بولنورلر .

ديزكىنلرى طوتان صول يومروق نفرک قارننىك وسطى ايلروسنده ودرت برمق آچيغنده بولنديريلوب طبقى قنطارمه بحثنده بيان اولنديغى وضعيتده طوتيلور وصاغقول دخى طبيعتيله اوموزدن اشاغى به صارقش وپرمقلىرني بوكلش والک اوستى طيشارو وبر آز ايلرو متوجه اولديغى حالده اويلغك کيروسنده طوتيلور .

تنبیه — ديزكىنلرک صول الده بولمىسندىنشى اکثريا صول اومهوزک ايلرويه وصاغ اوموزک دخى کيرويە قاچسى کي برطاقم خطالر حصوله کله جکندن بولنلرک وجوده کتورلماسنه دقت اولنليدر .

قنطارمه نك استعمالى

قنطارمه به نسبتله كمك تاثيرى ده شديلى اولمىسندن كم ايله اجرا اولنان تعليملرک ابتدالرنده قنطارمه ايله كمك برلكده اوله رق استعمالى اقتضا ايد . بونك ايچون (قنطارمه آل) قومانداسى ويريلور .

اشبو قومانداده صاغ الك باش وشهادت پرمقلىريله صول الك باش
پرمقى آلتندن چيقان صول قنطارمه ديزكىنى طوتيلوب صول كم ديزكىنه
مساوى اولنجيه قدر قيصالتيلور .

وقنطارمهك صاغ ديزكىنى دخی صاغ كم ديزكىنى ايله مساوى اوزونلقده
اوله رق صاغ الده طوتيلور .

قنطارمه ديزكىنلرېك فضله قالان قسمى ايلرويه طوغرى چوريله رك
او كطرفه طوغرى صارقيديلور .

حيوان اوزرنده قنطارمه ديزكىنلرى آلمش ايكن صول يوسروق قارنك
وسطى ايلروسنده وصاغ يوسروق دخی مذكور الك درت پرمق صاغ
طرفنده و آچيقنده و هرايكسى بر حذاده اولمق اوزره طوتيلور .

ياللكز كم ايله حيوانى سوق و اداره ايتك ارزو ايدلديكى تقديرده
(قنطارمه براق) قومانداسيله قنطارمه لر براقديريلور .

بو قومانداده نفر صول الك وضعتنى بوزمق سزېن يوسروغنى خفيفجه
آچار وصاغ الى واسطه سيله هرايكى طرفدن مساواتاً صارقه جق صورتده
قنطارمه ديزكىنلرېنى صول الى ايچنده قايدىروب صول الى تكرر اقبار وصاغ
الى يانطرفه صالويورر .

❦ كم ايله يوسروق حركتلرى ❦

كم ايله يوسروق حركتلرنده طوبلمق وقويو ويرمك حركتلرى طبقى
قنطارمه ده اولدېنى كې ايسه ده دونديرمك حركتك فرقى بولنش اولمسه نه
بناءً اصول اجراسى آتيده آروجه بيان ايدلمشدر .

❦ صاغه دونديرمك ❦

بونك ايچون صول الك اورته بوكوملرى نفر ك وجودينك اورته سى

قارشوسنه كلنجايه قدر چوريلور كه بو واسطه ايله صاغ ديزكين قيصاله جغندن حيوان صاغه طوغرى دونشه وضعت آلمش اولور . بئده صول الك باش پرهنى حيوانك بوينه طوغرى تقرب ايتمك اوزره سرچه پرمق صاغ مئيه طوغرى قالدريله رق يوسروق دها زياده چويريلور .

بو حالده ايچ ديزكين قيصالمسى وطيش ديزكينك دخى حيوانك بوينه تضيق ايتمش بولنمى حيوانى بولنديغى وضعتده دونمكه اجبار ايدر . مقصد حاصل اولدقدن يوسروق حال اصليسنه كتوريلور .

صوله دونديرمك

صول يوسروغى بيلكدن بروجهله چويرمايدر كه سرچه پرمق نفرک قارننه ياقلاشمش و باش پرمق دخى حيوانك صول اوموزينه طوغرى دونمش بولمايدر بو واسطه ايله صول ديزكين قيصالمش اوله جغندن حيوان صوله طوغرى دونشه وضعت آلمش اولور .

بئده يوسروق دها زياده چويريله رك سرچه پرمق هم نفرک قارننه ياقلاشمش و همده صول مئيه طوغرى قالديرلمش بولمايدر . او حالده صول ديزكين دها زياده قيصالور وطيش ديزكين دخى حيوانك بوينه تضيق ايتمش بولنور كه حيوان بولنديغى وضعتده صوله دونمكه مجبور اولور .

مقصد حاصل اولدقدن صكره يوسروق حال اصليسنه كتوريلور . اكر بر حيوان معتدلا نه ديزكين طوبلنمسنه اطاعت ايتمايسه اوزمان نفرطوبلامق و قويو ويرمك حركتلرينى مقصده موفق اولنجايه قدر بالناوبه اجرا ايدر ويوسروغك هر بر حركتنده قولك قسم سفلاسى و وجوده متعل قالممايدر .

كم وقتنظارمه باشلغى اورولمش ايكن باركيرك يد كده سوقى

قنظارمه ديزكيلرى باركيرك بوينى اوزرنده طورر . نفر كم ديزكيللرينى

حيوانك باشى اوزرندن اشاغى به آلوب صول اليه بروجهله طوتار كه صول
قولى وجودينه يتيشك و طبيعى اوله رق اشاغى به صارقش بولملى و صاغ
اليه دخى قنطارمه ديزكينلرينى قنطارمه بختنده بيان اولندينى اوزره طوتار .
قطمه مائرك خط وسطيسى اوزرنده اولان صف حرب نظامنى اخذ
ايتدكده صكره نفرات كم اديركينلرينى هرايكى طرفدن مساواتاً صارقق اوزره
هان جداغونك اوكنه و حيوانك بوينى اوستنده بولنان قنطارمه ديزكينلرينك
برال اكى مقدارى كيروسنه وضع ايدرلر .

كم قنطارمه اورولمش ايكن آته بنمك

كم ايله تعليم دورنده آتلور مائرك خط وسطيسى اوزرنده يابا اوله رق
بالاده بيان اولندينى اوزره اوچر خطوه آراقله برصره و برحذا اوزرينه
ترتيب اولنورلر . بعد آته بنمك ايچون تعليمجي اشبو (آت بنمكه حاضر
اول) قومانداسنى ويرر . بو قومانداده هر نفر صاغه دونوب برخطوه
صاغه كيتدكن صكره باش پرمغى داخل اولندينى حاليه صول اليه قنطارمه
ديزكينلرينى ايلرودن آلور و مذكور الك دردنجى پرمغى كم ديزكينلرينك
آراسنه صوقار سرچه پرمق كم و قنطارمه ديزكينلرى اراسنده بولنور .
بوانساده صول اليه كم ديزكينلرينى حيوانك ايلرويه كيتمسنه مانع
اوله جق درجده كرकिन طوتار .

بعد كم ديزكينلرينك اوچلرينى حيوانك صاغ طرفه آتوب صول
اليه قنطارمه اولندينى كى برطونام يله دن آلوب باش پرمقنه دخى صارار .
واياغنى اوزنكى به كچروب صاغ اليه اكرك آرد خانه سندن طوتار .
بوندن صكره (آت - بين) قوماندالرى و يريلوركه بونلركده اصول

اجراسی یوقاروده قطارمه واکر بختنده بیان اولنان حرکاتک اجراسندن عبارتدر .

❦ یره اینمک ❦

تعلیمی طرفندن ویریله جک اولان (یره اینمکه حاضر اول) قومانداسنده نفرات کم دیزکینلرینک اوچلرینی صاغ الی ایله صول الک التندن حیوانک صولطرفنه آتارلر . کم و قنطارمه دیزکینلرینی صول ال ایله حیوانه بنمکده اولدینی کی طوته رق قنطارمه بختنده بیان اولنان اصول اوزره اجرای عمل اولنور . (یره - این) قوماندالرنده حرکاتک کافه سی طبقی قنطارمه بختنده اولدینی کی یاییلور .

❦ درت نعل یورویشلری ❦

اگر درت نعل یورویشی ایله دقیقه واحده ظرفنده (۳۵۰) متره مسافه قطع اولنور ایسه بونوع یورویشه (اورته درت نعل) دینور . (آتلو درت نعل - مارش) قومانداسنه بشقه بر قوماندا علاوه اولنماش ایسه دائما اورته درت نعل یوریدیلولور . درت نعل یورتکم خصوصی یوقاریده مفصلاً ذکر اولنمتس اولدیغندن بوراده تکراره لزوم کوریله مامشدر .

❦ قیصه درت نعل ❦

اورته درت نعلدن قیصه درت نعله کچلمک لازم کلدکده (قیصه درت نعل - مارش) قومانداسی وریلور .

بو قومانداده نفرات اکر اوزرنده ایوجه اوطوروب حیوانک آرد قسمی ایلویه سورمک ایچون بالدرلرینی تاثیر ایتدیرلر . و حیوانلرک دیزکینلره طیانمسنه و بیونلرینک اوزانمسنه مساعده اولنمیوب دیزکینلری

طوبلامقله (آلیقومقله) حیوانك آرد قسمنی بویككه ویوروشنی قیصالمقله
مجبور ایتلمیدر .

قیصه درت نعلدن تکرار اورتہ درت نعله کچمك ایچون (اورتہ درت
نعل - مارش) قومانداسی ویریلور .

بوقومانداده نفرات اکر اوزرنده ایوجه اوطوروب وبر آز بانی
جیقورلنهرق بالديرلریله حیوانی حسنه کوره آز ویا چوقچه تضییق ایدرك
حیوانی اورتہ درت نعله کچیرلر . بوحالده یومروقلر ثابت قالمیدر .

عادتاوسرعتلیدن درت نعله کچمك خصوصلری یوقاریده ذکر اولندینی
کیدر . اشبو قیصه درت نعل ایله دقیقه واحده ظرفنده (۲۵۰ : ۲۶۰)
متره قطع اولنور .

درت نعلدن طور دیرمق ایچون (آتلو - طور) قومانداسی ویریلور .
اخبارده نفر حیوانی طوبلار (طور) قومانداسنده وجودك اوست قسمنی
بر آز کیرویه ویردکنمعدا هرایکی دیزکین قوتایجیه تأثیر (طوبلنهرق)
ایستدیرلهرك حیوان طور دیریلور . طور دیرلمزدن اول برقاج خطوه
سرعتلی یورودلمسسه مساعده اولنور .

طور دقدنصکره درحال دیزکینلر قویو ویریلور . وبالديرلرایله حیوانك
کیرویه کیمسی وصفیریسنی یان طرفه آتمسی منع اولندقدنصکره بالديرلر
وبومروقلر حال اصلیلرینه کتوریلور .

اوزون درت نعل

نفراتك درت نعلده دهها زیاده ملکه کسب ایتلمیرینه وحیوانلرینی
آچیق وسربست یوروشلرده کندولرینك ضبط واداره لرنده بواندیرمیلکه
اوزون درت نعلك اجراسنك بك بیوک تأثیر یاردمی واردر . بونك

ایچون اورتہ درت نعل ایله یورونمکده ایکن (اوزالت) قومانداسی ویریلور . بوقومانداده وجودک قسم اعلاسی طوغری طوتیلہرق بالدیر یاردملری دها قوتلیجه اجرا و حیوانک طبیعتنه کوره صیقهجه تکرار اولنور دیزکینلر ایله حیوانه بر آز سربست ویریلور سده فقط حیوانی داغا دیزکینک تحت تاثیرنده بولندیرملیدر .

اوزون درت نعل ایله یورینلورکن تعلیمچی طرفندن ویریلہجک اولان (قیصالت) قومانداسنده نفرات دیزکینلری طوبلایوب حیوانلرینی اورتہ درت نعلہ کچوریرلر . سرعتی به اینمامسیچون بالدیرلرک یقین طوتلمسی لازمدر . اوزون درت نعل حرکتلرینک قبالی مانثرلرله طار محللرده اجرا سنده تہلکه و خطا ملحوظ اولسنه بنسأ اشبو یورویشک اجراسی ایچون ضلع کیری (۲۰۰) و ضلع صغیری (۱۰۰) متره اولمق اوزره واسع محله بیوک برمانژک یا بلسمی اقتضا ایدر .

اشبو یورویشلہ دقیقه واحده ظرفنده (۴۰۰) مترو یعنی (۵۰۰) خطوه قطع اولنور .

حـ آله بیلدیکنه قوشدیرمق و هجوم یورویشی

بو حرکتک مانژده اجراسی جائز اولمیوب آجیق و سربست برمیدانده یاپدیرلمسی اقتضا ایدر .

هجوم یورویشنه باشلامق ایچون معین نقطه لرده اولمق اوزره نفرات اولا عادتاً و بعدہ سرعتی به کچوب صماغ و یا خود صول ایاقده درت نعل یورتدیرمک ایچون ایجاب ایدن یاردملری اجرا ایتمکـ مزین حیوانلرینی کندیلکلرندن درت نعلہ کچنجه به قدر سرعتلینک قرارینی آرتدیرلر . و تقریباً (۲۰۰) خطوه برمسافه اوزون و سکونتلی بردرت نعل ایله قطع

ایدل کدنصکره بارکیرلرینک طبیعتنه کوره یاخفیفجه بالدیر طوقنمسیله ویا ایجابنده جزئیجه مهموز تأثیریه حیوانلرینی دها سریع یوروتنمکه مجبور ایدرلر . یورویشه کچمک ایچون هر نقدر دیزکینلر ایله آزاجق سربسیت ویریلور ایسه ده یورویش انناسنده حیوانلری دیزکینلرک تحت تأثیرنده بولندیرمق لازمدر آله بیلدیکنه قوشدیرمقده سوارینک اوطوروشی اصلا دکیشمز فقط قوشدیرمزدن اول دیزلرک صیقیجه اکره یایشدیرلمسی وقیناقلرک ایوجه برلشدیرلمسی و یومروقلرک حرکت ایتدیرلمامسی و حیوانک حرکتنه تبعیب اولنمسی لازمدر .

هجوم یورویشنه ختام ویرمک ایچون نفرات اولادرت نعله بعده سرعتلی و صکره عادناه اینرلر .
تعلیم خانه میداننده تعلیم ایچون اشبو یورویشه ۲۰۰ : ۳۰۰ خطوه قدر یوروندیریلور .

موانعدن آتلامق

عجمی نفرک اوطوروشنک تحکیمی ایچون انلری مانعدن آتلامق ایجاب ایدر . نفر ممکن مرتبه امنیته حیوان اوزرنده اوطورمنی اوکرن کدنصکره اول امرده یره یاتیرلمش مانع صریفی اوزرندن آتلاتدیریلور که بومثللو موانعدن بارکیرلر سکونتله کچه جکلرندن نفراته امنیت کلش اولور . بعده مانع صریفی بوکسلندیربله رک آتلاتدیرلملیدر . آتلامق خصوصنده نفراته اولادرت قولای بعده کوچ حرکات تدریجاً اوکره دیلور . موانع دخی بری خندق و آرق کی عرضاً و دیگریده چیت و پرمقلق ویا دیوار کی ارتفاعاً آتلا نه جق مانع اولمق شرطیه ایکی قسمه تقسیم اولنورلر :
موانع عرض و ارتفاعی حیوانلرک قابلیتیه و آتلونک مهارتنه کوره اولملیدر .

تعلیملرک ابتدا سنده آتلواولا عادتا یوروشیله مانعه تقرب ایدوب (۳) خطوه قالدقده بارکیری بالدرلری واسطه سیله تضییق و تحریک ایدرک آتلاتمایدیر بعدله سرعتلی و درت نعل ایله دخی تکرار ایتدیرلملیدر نفرات مانعه تقرب ایتدیکی وقتده بارکیری بالدر و او یلقلری واسطه سیله قاواریوب او طوروشی تحکیم و بارکیری آتلاتمق ایچون بالدرلر ایله تضییق ایتلی و حیوانک صجراه بیلمسی ایچون دیزکینلر ایله سربسیت ویرلملیدر مانعی آتلاتورکن وجودک اورتیه قسمنک حیوانک حرکتنه تبعیت ایتسی و قیناقلرک اکر دن آیرلما سی و آتلونک مانعک اوزرندن ایلرویه باقیسی لازمدر . مانعی آتلاتدقدنصکره نفرات تدریجاً یوروشلرینی کوشه ده رک بارکیرلرینی عادتایه ایندیرملیدر لر . اکر بارکیر مانعه تقرب ایتدیکی زمان طورر و یا خود کیری کیدر ایسه بالدرلرک شدتلی تضییق ایله بارکیرک مقاومتنه غلبه اولنه رق آغز آغز ایلرویه سوق اولمایدیر .

اگر بارکیر مانعک اوکنه کلدیکی آنده بردنبره طورر سه حیوانی مانعدن قاجغه آلدیر مامق ایچون کیرویه یوز چویرتمکـ سزین آغز آغز کیرویه یوریتلی و آتلاتمغه مساعد مسافه قزانلدقدنصکره تکرار ایلرویه سوق ایدوب مانعی آتلاتمق و اکر حیوان مانعه کلدیکی زمان آتلامغه مخالفت کوسترایسه قیرباج دخی قوللا تمایدیر .

اوجینقی قسیمی

• علی العموم یورویش ائناسنده دقت ورعایت •

• اولمسی لازمکلان مواد •

بارکیر آخوردن چیقارلقدده اوزنکیلرک طوغری طوقه لئمنسه وباشلغک کوزل اویدرلش اولمسنه دقت اولملیدر . ویورویشه آلدیرمق ایچون اولا آزچوق برمدت عادتاً پورتکم ایجاب ایدر .
بارکیری اقتدارینک تحمیلدن زیاده تحریک ایتمامک ومختلف یورویشلرله یورینلدیکی زمان حیوانی یورماق ایچون یورویشلر دائماً سیاق واحداوزره اولملیدر .

یورویش ائناسنده سواری بلنی طوغری طوتهرق برسیاقدده وساکن اوطورمغه دقت ایدوب بالعکس متصل اگر اوزرنده ایلرو وکیرو قایمقدن وحیوانک اورلمسنی موجب اوله جق حالاندن اجتناب ایتلیدر وبارکیره زحمت وصقیندی ویرمامک ایچون بالیدرلرک صاللانماسنه ویومروقلرک اوتیه برویه چویرللماسنه وکیتماسنه دقت اولملیدر .

اکر حیوان ترسه له مک ایستر ایسه نفر یورویشی آغرلشدیرملی وقشائمق ایستدیکی زمان قشائمسی بتینجهیه قدر طور دیرلملیدر . بوندنمعدا سواری قطع اولنه جق مسافه نک بعدیتنه کوره کونده بر ویا بر قاج دفعه

طورر [•] و طور مق ایچون حیوانه زحمت و مضرت ویره جک اولان

[•] ایکی ساعته اوج المان میلندن (برالمان میلی ۷۵۰۰ مترودر) عبارت بر مسافه بی قطع ایتمک مطلوب اولدیغنه نظراً انشای حرکتده استعمال اولنه جق یورویشلرک جنس و مدت لری زیرده کی جدولده مناسب وجهله تعیین اولنمش اولمغه اشبو جدول بشقه مسافه لری قطع ایتمک ایجاب ایتدیکی حالده دخی مودل اتخاذ اولمقی اقتضا ایدر ایسه ده ایجاب حال و زمانک مساعدده سنه نظراً آ ز چوق تعدیل اولنه ییلور •

دقیقه	یورویشلرک انواعی	متره
۰۵	عادنا	۵۵۰
۱۴	سرعتلی	۳۳۶۰
۰۴	عادنا	۰۴۴۰
۱۴	سرعتلی	۳۳۶۰
۰۵	عادنا	۰۴۴۰
یره اینوب بارکیره ربط و تحمیل اولنمش اولان اشیایه باقمق و قولانلر کوشمش ایسه صیقمق و نعللری یوقلمق و بارکیری قشاندر یرمق ایچون •		
۱۴	سرعتلی	۳۳۶۰
۰۴	عادنا	۰۴۴۰
۱۴	سرعتلی	۳۳۶۰
۰۴	عادنا	۰۴۴۰
۰۵	یره اینوب نعللری یوقلمق ایچون	
۱۴	سرعتلی	۳۳۶۰
۰۴	عادنا	۰۴۴۰
۱۰	سرعتلی	۲۴۰۰
۰۵	عادنا	۰۵۵۰
۱۲۰	(ایکی ساعت =)	۲۲۵۰۰ متره

(اوج آلمان میلی)

بعض فنا یوللرده قطع مسافه ایجاب ایتدیکی حالده وقت مساعد اولدیقه بارکیری

کونش صیجاغندن ، روزکاردن ، یغموردن ، سینکدن ، الخ کبی عاری و مناسب بر موقع انتخاب ایدوب بوراده حیواندن اینر ونملارینی و حیوانک مایه سنه طاش بانوب باتمدینی معاینه ایدر .

اگر اراضی یومشاق ، سورلمش و یا قومسال ایسه او حالده حیوانه دیزکین سربستی ویرملی و بویله براراضیده سریع یورومک ایجاب ایدر ایسه ارقه قوللر اوزرینه زیاده ثقلت ویرمامک ایچون اوزنکیله باصه رق اکردن قالمایدیر .

اگر سواری بطاقلقدن کچمکه مجبور اولور ایسه اولزمان بطاقلنگ اک قیصه بولنه و کچمک ایچون امنیتی اولان جهته حیوانی سواق ایدر بوراده دخی حیوانه دیزکین سربستی ویریلرک آغر آغر یوروتملی و اصلا بالدير قوللانیموب صاغ الیله دخی یله دن طوته رق و حیوانک آرد قوللرینک سهواتله حرکتی ایچون اوزنکیله بر آز استناد ایدرک وجودک آغزلغنی ایلرویه ویرمایدیر اگر برقاج آتلو بریرده اولدقلری حالده حرکت ایدیورلرسه بربرلرینک ارقه سندن کیتمکدن اجتناب ایتلیدرلر . حیوان زیاده درینه باتار و باتدینی محلدن چیقماق ایچون چبالارسه اولزمان آندن اینوب و دیزکینلری اوزون طوتوب حیوانی اک قیصه بولدن صاغلام

اسیرکک ایچون درت نمل یوروشنک قوللانمماسی ایجاب ایدر . بناء علیه اشبو قطع مسافه جدولی دخی درت نمل حساب الیه رق ترتیب اولمشدر اوج میلدن زیاده برمسافه قطع ایتک لازمکاورسه هراوج میلده اون بش دقیقه لی بیوک برموله ویرمایدیر قطع اولنسه جق مسافه پک چوق اولدینی حالده بیوک موله لک یارم ساعتدن برساعته قدر تمید اولنمسی کفایت ایدر سده اشبو موله اثناسنده بارکیره بم ویرمک اقتضا ایتدیکی صورتده بیدن اول بر ساعت قدر استراحت ویرمک ایجاب ایتسندن بومثللو بیوک موله لک بر بقی ایکی ساعت قدر اولسی لازمدر .

طوپراق اوزرىنه چيقارمقدن بشقه چاره يوقدر طاشلق و طارضة الى اراضيده وكيجه قراكلغنده حركت ايدلدىكى وياخود قوللرى بوزوق اولان حيوانات اوزرنده بوللدىنى ائشاده سوارى بالعكس حيوانى برآز زياده جه ديزكىن و بالدير آراسنده طوتهرق هر وقتدن زياده دقتله سوق ايتمايدر .

دېك اولان يقوشلردن يوقارو چيقساركن آتلو حيوانك آرد قوللرينه خفيفلك ويرمك ايچون صاغ اليه يله دن طوتهرق ميلك درجه سنه كوره وجودىنى ايلرو و بالديرلرني كيرو آلوب و حيوانه لزومى قدر ديزكىن سربستى و يروب آغر و سكونتلى چيقمق شرطيله ايجاب ايتدكجه دخى بالديرلريله حيوانى ايلرو سورر .

دېكجه اولان براينشدن اشاغى اينركن نفر وجودينك اوست قسمى كيرو طوتهرق و ايلرو قايماسيچون اياغى برآز ايلرو اوزاتهرق اوزنكيهره طيانور بونيكله برابر حيوانك آغر آغر خط و ولرله نيورومسي ايچون حيوانى برآز آليقور اكر ميل زياده اولورسه آتلو حيوانى طوغرى ايندير ميوب ييلا نقاوى ايندير مليدر .

شاخه قالقان باركيئرلر

باركيئرلر ك شاخه قالقسمى اكثر يتله كوزل تربيه ايدلماش اولمىسندن وياخود يومر و قلك (ديزكىنلر ك) سرت قوللانلمىسندن ياخود فنا اوريلوبده آجيسنه تحمل ايدمه جكلرى صورتده تاثيرايدن باشلقلر ك زحمتدن قورتلحق ايچون ويا سوارينك عنف ايله معامله سندن و بعضاً دخى بالديرلر ك زورندن ايلرويه كلور و اكثر يتله اوركك و عنادجى باركيئرلر دخى سواريسنك ايتديكى استقامتمده كيتمامسى ايچون بوكى اويقونسزلقلرى اجرا ايدرلر . باركيئر شاخلندينى زمان سوارينك يابه جنى حركات و آله جنى وضعيت

موازنتی بوزمامق و کندیوسنی محافظه ایتمک ایچون اولیوب بلدکه او یغوانسز لاک
دقی ایچوندر .

بارکیر شاخه قالدقده سواری دیزکین سربستی ویرر و بارکیر اوستنده
کندیوسنک قاورایشله طوره میه جغنی اکلادینی حالده صاغ الیه یلهدن
برطوتام قیل طوتهرق وجودینک آغرلغنی ایلرویه ویرر و بالدرلرک
تضییقه بارکیری ایلرویه سوق ایتمکه غیرت ایدر .

بارکیرک شاخه قالمق ایچون طوره جغنی حس اولندینی آندم برطاقم
لقر دیلر ایله انی تسکین ایتمک چاره سنه باقلی و یاخود او آندم دیزکینلری
حیوانک بیونک اوستنه صاللا یلرک و بالدرلری طوقندیررق یورویشله
مشغول ایتمکه چالشمایدیر .

اورکک حیوانلر

اورکک حیوانلره صبر و سکونت و ملایمتله معامله اولمایدیر اگر حیوان
برشیدن قورقارایسه اوخشامق و سسلیتمکله اکا امنیت و جسارت ویرمایدیر .
سواری بومثللو حیوانه ممکن مرتبه دیزکین سربستی ویره رک و باشنی
صاغه و صوله چورتمیه رک اورکدیک شینک اوزرینه طوغری یورو تور
و بالدرلریله دائما اوستقامته طوغری سوق ایدر . بونکله برابر حیوانک
آنسزین طورمسنده و یا کیرویه دونمسنده سواری ایلرویه دوشمامک
ایچون وجودینک قسم اعلاسنی دائما کیرویه طوملی و او یلقلر واسطه سیله
اوطوروشنی تحکیم ایتمایدیر .

حیوان استعمال اولان شو وسائطه قارشو کله رک عنادایدیمک اولورسه
او حالده سواری حیوانک باشنی اورکدیک شینک عکسی طرفته چورروب
و مقابل بالدرینی دخی طیا یلرک بوجهله کچیرمک چاره سنه باقلی . اگر

بو واسطه ايله ده حيوان كچميه جـك اولور ايسه او حالده حيوانك صغريسنى اوركدىكى شينه چويرملى بـعدـه كيرو يوريتـمـك بـحـثـندـه بيان اولـنـان اصول اوزره اجراى حركتله اوركدىكى شيك حذاصنى برايكى خطوه كنجـهـ به قدر حيوانى خطوه بخطوه كـيـرـوبـه يوريتـمـلى و كـجـد كـد نـصـكره حيوانى طوغرولتوب يولنه دوام ايتـمـلـدـر .

چفته آتان حيوانلر

حيوانك چفته آتمسـنـك اسبابى اكثر يا آرد قسـمـنـك غـجـقـلـا نـمـسـنـدن و يا خودا كرك كيرويه اورولمسندن و آرد خانه ده كي اشيا نك حيوانه طوقنمسندن و قـلـبـجـك اورمسنه حيوانك آلهـمـاش اولـمـسـنـدن و يا خود مهموزك صيق صيق قولانلمسندن ايلرو كلور .

اسباب مذكوره بي اكلايوبده وقوعه سبب اولان قنالك دفعى قابل ايسه هر حالده منى چاره سنى آراملـدـر .

حيوان چفته آتاركن آتـلـو وجودينـك آغـرلـغـنى كيرويه ويرمك اوزره اكر اوستنده صيقـيـجـه اوطـورـر . بونـكـله برابر يوسروقلر قالدـيرـلـهـرق و ديزكـنـلـر قوتـلـيـجـه چـكـلـهـرك حيوانك باش و بويى نـمـكن مرتبه يوقارو قالدـيرـلـور . و بالـدـيرـلـر دخی حيوانى ايلرو و ديزكـنـلـره طوغرى سـوق ايتـمـك ايجون لزومى قدر تاثير ايدـه بـيـله جـك و جـهـله قولانك كيروسنه وضع اولنور .

حيوانك آلوب قاچمى { باشى ضبط

اولنيان حيوانلر

حيوانك آلوب قاچمى اسباب مختلفـهـ دن و آنـسـزـين ظهوره كلان بعض وقوعادن تولد ايدر .

حيوانك قاچچىنى موجب اولان حالات ايسه باشلىك حيوانك باشنه لايقيه اويماسندن و اغزاق وياديز كينك قيريلوب قوماسندن وياسوارينك سوء حر كاسندن طولاي شاشيرمسندن ويا خود حيوانك خير چيناق و تيتيزلىكى اطاعتى شاشيرتوب محو ايتمسندن ويا خود جوهرينك زياده لكندن ناشى حاصل اولان سرعتك درمجه سنى آزلتمغه مقندر اوله ماسمسندن ويا حيوانك اوركمه سنى موجب اوله جق اشيا نك آنسزىن حيوانك كوزينه كورونمسندن ويا خود آردقولارينك ضعيف و عذرلى اولمسه مبنى يوروشنى اغرلشدير مقلقه پيدا اوله جق اغريدن قورتيلمهنى آراشدير مسندن ايلرى كلور .

اشبو خويسز قللى دفع وازاله ايتك همچون انلرى حصوله كثورن اسبابى توليد ايتدير مكدن اجتناب ايتمكه دقت ايتلدير .

بونلكه برابر سوارى دائما نظر و دقتى حيوانك قاچچىنى موجب اوله جق اشيا اوزرينه حصر ايدوب آنسزىن ظهور ايدم بيله جك وقوعاته قارشو حاضر بولنلدير كه حيوانى تسكين ايدم جك (سسانمك ، اوخشامق ، النخ كې) مناسب حر كاتى تمام وقتنده اجرا ايدم بيلسون .

حيوانلر ياباش و بوينى ايلرو طوغرى اوزاتهرق ويا خود باشى و برونى يوقارو قالديره رق ويا خود چكه سنى كو كسسه ياقلاشديره رق قاچارلر حيوان نصورتله قاچار ايسه قاچسون مقصد نهايت طور ديرمق اولوب بونك صورت اجرا سيله استعمال اوله جق ياردملر حيوانك قاچچسسه نظراً مختلفدر اكر بار كير باش و بوينى ايلرو طوغرى اوزاتهرق قاچار ايسه او حالده وجودك قسم اعلا سنى كير و طوتوب قوللرى صيقيجه وجوده ياشديرملى و بالديرلر ساكن و بار كيره طوقه نامق همچون اشاغى يه صارقيق بولنلى و اوزنكيلى اوزرينه ابو جهه باصيله رق كم و قنطارمه ديز كينلرى هرايكى ال ايله مساوى

اوزونلقده طوتیلوب هر وقتکی کبی دن دها زیاده تا شیرلی ودها دواملی اوله رق
چکیلوب قویو ویرلملیدر .

اگر بارکیر باشنی یوقارو قالدیرم رق قاجار ایسه آتلو اوطوروشنی
یوقاروده تعریف ایدلدیکی اوزره تحکیم ایتدکدن صکره اللرینی اشاغی
ایندیره رک دیزکینلری چکر . اگر حیوان باشنی اوکنه اکهرک قاجار سه
آتلو ایکی الیه کم ویا قنطارمه دیزکینلرینی قوتلیجه طارتمق ویا دسترملک ایله
حیوانک باشنی یوقاری یه قالدیرم رق طور دیرمنک چاره سنی آرا ملیدر .

اگر بو واسطه لر ایله ده حیوانی طور دیرم رق ممکن اوله مزایسه او حالد
اوکنده مساعد میدان بولندیقی تقدیرده یورولنجیه قدر قوشمسی ایچون
حیوانی کندی حالنه ترک ایتلمیدر ویا خود اراضی مساعد ایسه کیتدکجه
کوچلدلک شرطیله دائره رسم ایتدیرلملیدر .

حیوانلر آله بیلدکارینه قاجدقلری زمان یوقاروده کی واسطه لر ایله
ضبط ایتک ویا طور دیرم رق ممکن اوله مدینی و سوار ی دخی کندوسنک
تلف اوله جغنی حس ایتدیکی آنده کندیسنی قورتارمق ایچون جسارته
اکردن اشاغی یه آتلا نمقدن بشقه چاره یو قدر .

سوار یورویه رک ویا یوزه رک حیوانله صودن کچمک

سوار ی صودن کچرکن قارشوکی ساحله بولنان نقطه مطلوبه یه
واره بیلیمک ایچون آقندی یه قارشو مائل براستقامت آلور . صویک
دیننده واقع طاشلره وچقورلقلره باصه رق دوشمامسی ایچون حیوانی
دیزکین و بالدرلر آراسنده ابوجه طوتملی آتلو صودن کچرکن کوزی
قرار ماق ایچون صویه باقیوب دائما قارشوکی ساحله واصل اولمق استدیکی
نقطه یی کوزدن آیرما ملیدر .

حيوانه صوايحيرمك مراد ايدلمزسه صودن چكر كن حيوانك طور مامسى
وباشنى اشاغى به اكمامسي چون بالدير لر ايله تضيق ايدوب ايلرو س-وق ايتلى
اكر صوايحيرمك استنيلورسه صويه كير مزدن اول صولنى چيقارملى و صوده
طور دير يلوب ايجمسه قولايلىق ويرمك ايجون لزومى قدر ديزكين سربستى
ويرملى . حيوان ص-وا ايجمزدن و يا خود ايج-د-ك-د نصكره او ك اياق لر يله
ايشينور و آرد اياق لر نى دخى بوكر ايسه شو خصوص حيوانك صويه ياتمق
نيتنده بولنديغنه بر علامت صحیحه در بونى منع ايتمك ايجون آتلو او آنده
دزكينلرى قيصالت-ه رق حيوانك باشنى يوقار و قالدیرر و بالدير لر يله حيوانى
تضيق ايدوب ايلرويه سوق ايتمكه غيرت ايدر .

قارشوكى ساحله چيقلدينى آنده حيوان بر آز طور دير يلوب باشلغك
دوزلدلمسى و حيوانك سيلك كتمسى و بر آزده استراحت ايتمى ايجون يره
اينمليد .

درين و آق-ديسى سريع اولان صولردن بار كير ايله يوزه رك كچمك
ايجاب ايدرسه بار كيرك كچمكه آلديرلمش بولتمسى وينيجى يوزر كن
بار كيرى شاشير تمامق ايجون انك دخى يوزمك بيلمسى لازمدر . بار كير ايله
يوزه رك صودن كچيلور كن بار كيرك اوزرينه اوطور ميوب اش-اغيده بيان
اولنه جنى وجهله آتلونك دخى يوزه رك كيتمى اك اعلا بر اصولدر
چونكه آتلو بار كيرك اوزرينه اوطور دينى حالد ويره چكى آغزلق سبيله
بار كير باشنى صويك طيشاروس-سند طوتمق ايجون زحمت چكر . بار كيرى
قويروغندن طوتوب يوزه رك كچمك دخى محذور ايدر . چونكه بار كيرك
قويروغنى اش-اغيده بولنه جفندن س-وارى باشنى صويك طيشاروس-سند
بولنديرمق ايجون زياده كوچلك چكه جكندن بشقه بار كيرى مطلوب ايلديكى
استقامته توجه و كيرويه دونمك ايستديكى حالد ممانعت ايتمى ممكن اوله مز .

یوزەرك وباركېر دخى اكرلى اوله رق صودن كچمكه مجبوريت حاصل اولمش
ایسه باركېرى صویه سوقزدن اول قولانلرى و آتلونك آرقه سنده تفنك
وار ایسه آنیدخى یوزدیرمك ایچون قایشنى كوشتكدنصكره حیوانك
صوافنى كوشتملى وقوصغونى دخى قویروغندن قورتارملى وبرونسالفله
بونغاز اتى قایشنك دخى صیقى اولماسنه دقت ایتلى وایاقلریدخى اوزنكیدن
چیقارملى بعهده باركېرى صویه سوقه رق وكم دیزكینلرینى كوشته ترك
قنطارمه دیزكینلرله سوق ایتلیدر . باركېر ایاقلرینى یردن كسیدیكى كې آتلو
وجودینك قسم اعلاسنى ایلرویه ویروب صول الیه یلهدن وجداغونك
برقاریش قدر ایلروسندن وصاغ الیه دخى صولونك یقیننده وینه یلهدن
طوتدینى حالده قوللرینى ایلرویه وایاقلرینى دخى او آنده برلشمش اولدقلىرى
حالده باركېرك اوستندن شكلمه كوستلیدیكى وجهله كیرویه اوزاتیر
و باركېرلر یوزەرك كیدركن اتلو دخى باركېرك یله سندن طوتمش اولدینى
حالده یوزركې یالكر بجاقلرك اوزانوب قبانقى حرکتلرینى متعاقباً وبلافاصله
اجرا ایدرك وباركېرله برلکده یوزەرك كیدر باركېرك تکرار یرە باصدینى
حس ایلکده بلا تلاش اكرك اوستنه اوطور یوزەرك كیدركن باركېرى
استقامت مطلوبه یه توجیه ایتك ایچون اصلاً دیزكین قوللانمىوب ایجاب
ایتدكجه صاغ ال الیه باركېرك یوزینه صوآته رق قوماندا ایتلیدر وبرده آتلو
باركېرك صویك منصبى جهتنده كى طرفده بولنیلدرکه باركېرك آقندى
استقامتى تعقیب ایتسنى منع ایده بیلسون و آقندینك باركېرك آلتنه سورمى
تهلکه سندن كندیسنى قورتارە بیلسون باركېرى آقندى یه قایدیرماق ایچون
برآز آقندى یه قارشو کوتورملى اكر باركېر ایلرى كیتك استمز ویا اوركر
ویاشاحه قالقارسه اصلاً دیزكینلرى چكماملى و حایقیر ماملیدر یالکز سسلنەرك
واخشا یه رق باركېرى تسکینه چالشملى .

بار کیر قولایقله صویه کیرمک وقارشوکی ساحله واردینی کبی
چیقه بیلیمک ایچون صوکنارلرینک کیریله جـک وچیقله جق یرلری زیاده
میللی اولما ملیدر .

بار کیر اوزرنده قلنج چکـمک

تعلیمچینک (بلوک چـک - قلنج) قومانداسـنده نفر صاغ الی
دیزکینلری طونان صول النک وضعیتنه خلل ویرمیه جک صورتده مذکور
النک اوزرندن آشیره رق قلنجی قبضه سـندن طوتوب وسرعتله چـکوب
قینندن چیقارر وهان صاغ الی صول النک اوزرینه کتیرر وقلنجی کسین
طرفی صوله متوجه اولمق اوزره عمودی وضعیتده طونار بعدم کسکین طرفی
ایلرویه وارقه سی دخی اوموزینـک چوقور محلنه کلک اوزره اک قیصه
یولدن قلنجک قبضه سی صاغ اولیغک اوستنه واولمق ایله قالجه مفصلنک
ایکی ال کنیشلکی ایلروسـنه کتوروب قویار بو حالده صاغ الک شهادت
واورته برمقـلری قبضه یی ایلریدن وباش برمق دخی کیرودن قاورامش
بولنور دردنجی وسرجه برمقلر قپالی اولدینی حالده قبضه نک کیروسـنده
ومذکور الک آلاجنی ایله برابر اولیغه تماس ایتمش بولمیلیدر .

قلنجک بوجمله طوتیلیشه (حاضر طور) وضعیتی تسمیه اولنور .

قلنج قویق

بونک ایچون « بلوک قوی - قلنج » قومانداسـی ویریلور . « بلوک
قوی » اخبارنده قلنجی اک قیصه یولدن وجودک اورته سـنه قارشو کتوروب
قلنج چکـمک حرکتک قلنج قومانداسنک برنجی حرکتنده بیان اولنان وضعیتده
طونار . واشبو حرکتی اجرا ایتمک ایله ایتمک برمقلریله دخی
قبضه یی تکرار قاورار .

« قلنج » قومانداسنده صاغ الى عموداً كوكسك اورتەسى حذاسنه قدر
 قالديرر وصاغ يومروغنى بىلكدن اعتباراً صوله ياتىروب قلىجك ارقەسىنى
 صول قولى اوزرىدن قايدىرەرق برەمەقدار اشاغىيە اينديرر . وقلنجك
 اوجنى قىنك اغزىنە تطيق اتمك همچون صاغ الى قلىجك ارقەسى كوكسىلە
 حفيىفجە تەماسدە اولق شىرطىلە يوقارويە طوغرى قالديرر وبواندە باشى
 دخى صوله چويرر وقلنجك اوجنى قىنك اغزىنە تطيق ايتدكە ايتەرك
 قىنە قور وصاغ الى دخى يان طرفە صاليويرر اشبو قلنج قويىق حركىتى
 ياطورر وياعادتايله بورركن اجرا اولنور .

❦ قلنج ايله سلام طور مق ❦

حاضر طور وضعيتنده ايكن (سلام - طور) قومانداسى ويريلور
 بوقومانداده قلنج وجودك وسطى ايلروسنه كتورلدكدنصكرە صاغ قول
 طبيعى برحالدە اشاغى صارقيدىلوب صاغ ال اويلغك كيريسندە وقلنج ناملوسى
 صاغ مەموزك ارقەسەندە وكسكىن طرفى حيوانە طوغروچويرلمش اولەرق
 عموداً اشاغى صارقيديريلور .

تەلجىچىنك (حاضر - طور) قومانداسەندە نفرات قلنجى اول
 وجودك وسطى ايلروسنه اورادن دخى اويلق اوزرىنە كتورروب حاضر
 طور وضعيتنى اخذ ايدرلر .

❦ طونلر ك انواعى ❦

باركرك وجودىنى ستر واحاطە ايدن اينجە قىللار ايله وفويروقلرىنى
 تەجەيز ايدن اوزون وقالين قىللر ك رنككە (طون) تەبىر اولنور .

طونی تشکیل ایدن قیللرک رکنلریله نسبتلرینک مختلف اولمسنه نظر آتتونلر اقسام متنوعیه تفریق و تقسیم اولنورلر .

یاغز طون — بارکیړک وجودینک قیللری پارلاق وقوزغونی سیاه برر نکهده اولور . اگر پارلاق اولمیوبده صارییه مائل کورینورسه اکا دخی صواق یاغز تمییر اولنور .

طوری طون — صارییه میال قرمزیه و طارچینی رنکلرینه قریب قیللرک تجمعندن تیکون ایدن و حیوانک وجودیله قوللرینک قسم اعلاسی ستر ایدن قیللرک رنکی قرمزییه قریب اولوب یالکز قوللریله یله وقویر و قیلرینک سیاه اولمسندن عبارت برطوندرکه برقاچ نوعی وارد .

قوله طون — قیللرک رنکی صارییه برر رنک ایله ملون ایسهده بعضاً صاری و بیاض و بعضاً دخی قاعدهسی صاری اوچلری بیاض قیللردن عبارت بولنور .

قیرطون — سیاه و بیاض قیللرک وجود حیوانینک کافه اقسامی اوزرندہ نسبت مختلفه اوزره قاریشملرندن حاصل اولان برطوندرکه انواع مختلفهسی وارد .

بوز طون — بیاض و قرمزی قیللرک اجتماعندن حاصل اوله رق یله وقویر و قکاه طونک وکاه اشبو ایکی نوع قیللردن برینک رنکیله ملون بولنور .

قورت قولهسی — بونوع طونک رنکی قورت توینسه مشابه اولوب بعضاً سیاه و صاری قیللرک اجتماعندن و اکثراً قاعدهسی صاری اوچلری سیاه قیللردن تشکیل ایدر .

اخرچ طون — (قزل طون) . سیاه و بیاض و قرمزی قیللرک اجتماعندن متشکل اولوب قوللریله یله وقویر و غنی تجهمز ایدن قیللرک رنکی

طونك رنگه مشابه بوانورسده اکتیای برآز قویوجه رنگلی اوله رق بولور .

آلاجه طون - (صاقصغان آلاجه سی) بونوع طونلرده بیوجک لوحه شکلنده اولمق اوزره ایکی رنگ مشاهده اولورکه بونلردن بری مطلقا بیاض اولمق شرط اولدیغندن عادتاً صاقصغان قوشینک تویلیری مثللو آلاجه بولور بونکده برچوق نوعلی واردر .

منتظم و غیر منتظم یوریشلر

ایاق آتیشلرینه نظراً حیوانلرک یوروشی عادتاً وسرعتلی ودرت نعل اسملریله اوج قسمه تقسیم اولنورکه بونلره طبیعی یوروشلر دخی دینور . عادتاً یوروشده بارکیر ایاقلرینی متعاقباً قالدیروب عینی وجهله باصار شویله که : بارکیر اولا صاغ اوک ایغیله حرکته باشلامش ایسه عقیبنده صول قیچ ایغنی وبعده صول اوک ایغنی ونهایت صاغ قیچ ایغنی یردن قالدیرر . بوحالده قطری اولان ایکی ایاقلری دائماً یرده و دیگر ایکیسی قالمش بولنق اوزره عینی وجهله یره باصار بارکیر عادتاً یوروشینه اوک ایاقلریله بدأ ایدر .

عادتاً یوروشنک خطوه سی (۷۰ الی ۷۵) سانتیمتره اولوب دقیقه واحده ظرفنده اشبو یوروشله (۱۲۵) خطوه قطع اولنور .

منتظم سرعتلی یوروشنده بارکیرلر قطراً (صاغ قیچ ایغیله صول اوک ایغنی و صول قیچ ایغیله صاغ اوک ایغنی برلکده اوله رق) اولان ایاقلرندن برینی و آنی متعاقب دیگرینی ایلرو چیقاروب ینه اولوجهله یره وضع ایدرک یوردرلرکه بونده دخی فاصله لری مساوی اولمق اوزره ایکی صدا حس اولنور .

اشبو سرعتلی یورویشتنك خطوه سنك طولی وسطی اوله رق (۱,۲۰)
متره اولوب دقیقه واحده ظرفنده ۳۰۰ خطوه (۲۴۰) متره قطع اولنور.
درت نعل یورویشلرنده ایسه حیوانلر بروجہ آتی ایاق آتہ رق
حرکت ایدر لر .

شویله که مثلاً اکر حیوان اک اول صول قبیج ایاغی ایله حرکتہ
باشلامش ایسه مؤخرأ صول اوک ایاغیله صاغ قبیج ایاغی (قطری اولان
ایاقلرنی) واک صکره صاغ اوک ایاغی قالدیرر وتکرار اولوجہله یرہ
وضع ایدرک حرکت ایدر .

بوحالده صاغ یان ایاقلری صول یان ایاقلرنی تجاوز ایتش بولورکه
بونوع درت نعللرہ صاغ یانیله درت نعل تعبیر اولنور صول یانیله یوریدیکی
حالده بالاده بیان اولنان حالاتک عکسی حصوله کلور . بوندن اکلاشیلورکه
بارکیر لر درت نعل یورویشلرینہ آرد ایاقلریله بدأ ایدر لر .

درت نعل یورویشتنده خطوه نك طولی وسطی اوله رق (۳) متره
اولوب دقیقه واحده ظرفنده ۴۰۰ خطره (۳۲۰) متره مسافه قطع
اولنور .

بویورویشلردن بشقه دها برقاچ نوع یورویش واردرکه انلر دخی،
رهوان ، جبہ یورویشی وقرہ اشکین اسملرنی الورلر .

رهوان یورویشتنده بارکیر صاغ اوک ایاغیله صاغ قبیج ایاغی وصول
اوک ایاغیله صول قبیج ایاغی برلکده اوله رق چیقاریر . وینہ اولوجہله
یرہ وضع ایدرک یورر .

جبہ یورویشتنده حیوانلر اوک ایاقلریله سرعتلی و آرد ایاقلریله
درت نعل و یا خود اوک ایاقلریله درت نعل و آرد ایاقلریله سرعتلی
یورویهرک حرکت ایدر لر .

قره اشکین یورویشندە ایسه بارکیر سرعتلی یورویشندە اولدینی مثللو
قطراً واقع اولان ایاقلرینی همان برلکده تحریک ایدرک وصـ چرایه رق
یورورسەده ارد ایاقلرینی اوک ایاقلرندن اول باصدیغندن هر آیاغک صداسی
آیری آیری ایشیدیلور .

بربارکیرک وجود خارجیسنک اقسام مختلفه سی

- ۱ — باش
- ۲ — بویون
- ۳ — جداغو
- ۴ — اوموزلر
- ۵ — کوکس
- ۶ — اوک ایاقلر
- ۷ — چکه الی چقورانی
- ۸ — بل
- ۹ — قبورغه
- ۱۰ — قولانلرک مرور ایتـدیکی محل
- ۱۱ — قارن
- ۱۲ — بوش بوکورلر
- ۱۳ — صغری
- ۱۴ — قویروق
- ۱۵ — قالچہ، اویلق
- ۱۶ — ارد ایاقلر

۱۷ — حنب قطه سی

۱۸ — طبوق

۱۹ — طرناق

بازلغك مختصراً اقسام مختلفه سی

باشلق — قنطارمه ایله کم و دیزد کینلردن عبارتدر .

قنطارمه . ایکی اوچلری خلقه لی و هر طرفه دونه بیله جـك صورتده بری دیگرینه طاقلمش ایکی دیرسکدن (آغزلق) عبارتدر که ایکی طرفنده برر زنجیر و بررده خلقه لری واردر .

کم — بروجه آتی اوچ قسمدن مرکبدر .

۱ — اغزلق اولوب مدور قسمنه « محراب » دوز قسملرینه « طبان » تسمیه ایدیلور . حسلی حیوانلرده دوز و حسی نسبتاً آزاوانلرده محراب درجه حـسك آزلغنه کوره بیومك اوزره محرابلی اغزلق قوللانیلور .

۲ — قوللر اغزلغك طبانلرینه برچین واسطه سیله مربوط اولوب اوست قسملرنده بولنان آصقی دلیکلرینه یناق قایشلری و آلت طرفنده کی قوللرک نهایتلرینه مربوط خلقه لره دخی دیزکینلر طاقیلور . واکثریا اوست قسم آلت قسمك اوچده بری ویانصفی اولق اوزره یاپیلور .

۳ — صواق زنجیری اولوب چکه الی چقورلغنده بولمق اوزره قوللره چنککلر واسطه سیله ربط اولنور .

دیزکینلر — کم و قطعـارمه دیرکینلرینک بارلاق جهتلری طیشطرفه کلك اوزره کم و قنطارمه خلقه لرینه طاقیلان ایکیشر اوزون قایشلردن عبارتدر .

قایش یولارک اقسامی دخی بروجه آتیدر .

- ۱ — تېهلاک . یناق قایشلرینی طوتمغه واسطه در .
- ۲ — آلتاق . تېهلاک ویناق قایشلرینک کپرو قایمسنه مانعدر .
- ۳ — یناق قایشلری . یناغک طولنجه تمديد اولنه رق هرايکی طرفنده قنطارمه فلقه لری ایچون برر درت کوشه لی دیلسز خلقه بولنوب اوست طرفلرنده دخی قایش ایلکک موجوددر .
- ۴ — بوغاز آلتی قایشی . باشاغک حیوانک باشندن چیقمسنی منع ایچوندر .
- ۵ — برونسالق قایشی . یناق قایشلرینک متانتنه وکک تاثیر ایتسنه خدمت ایتلیدر .

❦ اکرک اقسام مرکبسی ❦

- اکرک اقسام مرکبسی مختصراً بوجه آتی بیان اولنور .
- ۱ — اکرک خانهسی — سوارینک اوطوره جنی چوقور محله تسمیه اولنور .
- ۲ — اکرک اوک خانهسی — اکرک اوک طرفنده کی یوکسک محلی اولوب جداغویي محافظه ایدر .
- ۳ — اکرک آرد خانهسی — اکرک کپرو طرفنده کی یوکسک محله تعبیر اولنوب حیوانک بلنی محافظه ایدر .
- ۴ — قولانلر — اکری حیوانک صرتنه ربط ایتکه مخصوصدر .
- ۵ — اوزنکیلر — آتلونک بجاغنی طاشیمغه مخصوص اولوب برطبان ایله ایکی قولدن وزاخه قایشلرینک کچمسنه مخصوص برلیکدن مرکبدر .
- ۶ — زاخه قایشلری — اوزنکیلری طاشیمغه مخصوصدر .

۷ — طارقی قایشلری — قولانك اكره ربطنه واوزالتیلوب قیصالتلمسسه
مخصوص صدر .

بارگیری تیمار ایتمك اصولی

تیمار حیوانك دریسسك مساماتی آچار و بوواسطه ایله حیوان
تمیزلنوب کوزلاشور . و حیوانك باقی دخی ایو اولورسه توپلرینه
پارلاتیر .

بارگیری تیمار ایتمك ایچون باشی یولاریله یوکسکجه باغلندقدنصکره
نفر صاغ ایله قشاغی بی وصول ایله دخی حیوانك قویروغنی طوتوب
صاغریسندن بویونه و بویندن صاغریسسه قدر صاغ طرفك بالمله
اتلی اولان یرلری اوزرنده قشاغی بی متعاقباً خفیفجه کزدریر بعدہ صول
ایله قشاغی بی و صاغ ایله بارکیرك قویروغنی طوتوب صول طرفنی دخی
وجه مشروح اوزره قشاغیلر فقط بارکیرك کیکلی یرلرینه ودریسی اینجه
اولوبده قشاغی تأثیرینه تحمل ایدیه چك محللرینه قشاغی اورمقدن اجتناب
اولملیدر .

بعدہ تیمار سوپورکه سیله حیوانك باشی ، کووده و قشاغی تأثیر
ایتدیرلیان محللری و بجاقلری ایوجه سوپوریلوب قبا کیر و توزلر سیلکیلور .
آلا فرانغه قشاغی ایله حیوانی تیمار ایتمکده ایسه نفر فورچه بی
صول النسه و دیشلری یوقارویه اولق اوزره قشاغی بی صاغ النسه آلور
و بارکیرك صاغریسی یانسه کلوب فورچه بی ابتدای امرده بارکیرك
توپلرینك دیکنه بعدہ توپلرینك یاتنه طوغری متعاقباً سورده صول
طرفك هر محلاتی فورچه لدقدن صکره صاغ طرفنی دخی ینه بووجهله
فورچه لار . فورچه نك الدینی کیری کیدرمك ایچون فورچه بی قشاغینك

آغزندن کچورملی . وقشاغیده کیر بریکدکجه قشاغی بی قانی برشیننه یواش یواش اورارق دروننده کی طوزلری دوکلیدر .

سپورکه (ویا فورچهلمق) ایشی بیتدکدنصکره تیمار ایدن نفر هرایکی الینه برر سیلکی « کبره » کچیره رک برالنده کی کبره ایله حیوانک تویینک دیکنه وبعده دیکر النده کی کبره ایلده یاتمنه طوغری سیله رک یعنی اوغهرق حیوانک اوزرنده قالمش اولان توزی آلیر .

بوندنصکره الینه ایصانمش سونکری آلوب سونکر ایله بارکیرک کوزلری ورون دیکلری وچاوایله مقعدی سیلنور . ویا ايسه ییقانور واک نهایت حیوانک ایاقلری دخی تمیزلنور وایجاب ایدرسه تمیزجه ییقانور . برجم ایله یله وقویروق ایوجسه فورچه لملیدر قویروغک طراق ایله طرانمسی قیریلوب دوکولمسی موجب اوله جغندن یالکز فورچهلمق وپرمقلرایله آیرمق کفایت ایدر .

قارنندن وصرتندن خویلنان حیوانلری دهـا زپاده خویلندیرمامق ایچون بغایت دقتله تیمار ایتملیدر .

قولانک ایچنده کی تویرلر توز ویغمور و حیوانات ،ضره نك دخولنه ممانعت ایتدیکندن اصلا قیرپیلمز .

ایلك بهارده حیوانلر تویرلرینی دوکوب دیکشدره جکلرندن بوزمانلرده حیوانه خسته نظریله باقیلوب ترلمسندن وصفوق آلمسندن محافظه اولنملیدر .

انها

مکتب قنون حربیه شاهانه مطبعه سنده اوچنجی دفعه اوله رق
طبع و تمثیل اولمشدر


فی ۲۱ صفر سنه ۱۳۲۰ وفی ۱۶ مایس سنه ۱۳۱۸

فهرست


صفحہ	برنجی قسم
۱	بارکیرک یدکده سوقی
۲	یایا اوله رق حذابه کلک
۳	آته بنک
۵	یره اینک
۶	نفرک بارکیر اوستنده او طوروشی
۹	یومروقلرک وضعیتله بارکیرک قنطارمه ایله سوقی
۱۰	یومروق حرکیلی ، دیزکین طویلایق
۱۱	دیزکینلری قویو ویرمک
۱۲	بارکیری صاغه ویا صوله دوندیرمک
۱۳	بالدیر حرکیلی
۱۴	مهموز استعمالی
۱۵	برده بوزماق
۱۵	عادتایورمک و طورومق
۱۶	راحت ایتک . حاضر اولماق
۱۷	تام ماژده یان دکیشدیرمک
۱۷	تعلیم انصکره صف حرب اولماق
۱۸	سرعتلی یورویشلرینک انواعی
۲۰	طوررکن سرعتلی یورونمک و سرعتلی یوررکن طوردیرمق
۲۰	سرعتلی یورویشنی اوزالتمق و قیصالتمق
۲۱	ایکینجی وضعیتله یوریمک
۲۲	دائرة اوزرنده حرکت

دائرہ دیکھدیرمک	۲۴
دائرہ کوچولتمک	۲۵
دائرہ بی بیولتمک	۲۵
چرخ حرکتی در سلسلہ	۲۵
کیرویہ چرخ حرکتی	۲۶
پرندہ دوشلرہ اولک قسم اوزرندہ دوش	۲۷
آرد قسم اوزرندہ دوش	۲۸
اورتہ قسم اوزرندہ دوش	۲۹
کیرو پوروتمک	۲۹
یناشق حرکتی	۳۰
صرہ بعدیلہ یوریمک	۳۳
درت نعل	۳۴
ایکینچی قسم	
اکراوزرندہ وضع وطوروش	۳۷
اکر وقنطارمہ اورولمش ایکن آتہ بنمک ویرہ اینمک	۳۸
اوزنکیلرک اوزونلغی وایاغک اوزنکیدہ وضع وطوروشی	۴۰
انکلیر سرعتلیسی	۴۰
کم وقنطارمہ دیزکینلرینک برلمکدہ طوتلمسی	۴۱
قنطارمہ نک استعمالی	۴۲
کم ایله یومروق حرکتلری . صاغہ دوندیرمک	۴۳
صولہ دوندیرمک	۴۴
کم وقنطارمہ باشلغی اورولمش ایکن بارکیرک یدکدہ سوقی	۴۴


کم و قظارہ اور لمش ایکن آتہ بنک ویرہ اینک	۴۰
درت نعل یورویشلر قیضہ درت نعل . اور زور دیر کلان	۴۶
اوزون درت نعل	۴۷
آلہ بیلدیکنه قوشدیر مق و هجوم یورویشی	۴۸
موانعدن آتلا مق	۴۹
او چنجی قسم	
علی العموم یورویش اثناسنده دقت ورعایت اولنسی لازم کلان مواد	۵۱
شاخہ قالقان بار کیرلر حاجی سیر یورویش	۵۴
اور کلک حیوانلر قیضہ یورویش	۵۵
چفته آنان حیوانلر قیضہ	۵۶
حیوانک آلوب قاجسی (باشی ضبط اولنمیان حیوانلر)	۵۶
یورویه رک ویا یوزہ رک حیوانلہ صودن چکمک	۵۸
بار کیر اوزرنده قلنج چکمک . قلنج قویق	۶۱
قلنج ابلہ سلام طور مق	۶۲
طونلرک انواعی	۶۲
منتظم و غیر منتظم یورویشلر قیضہ	۶۴
بربار کیرک وجود خارجیسنک اقسام مختلفہ سی	۶۶
باشلنک مختصرأ اقسام مختلفہ سی	۶۷
اکرک اقسام مرکبہ سی	۶۸
بار کیری تیمار ایتمک اصولی	۶۹




صول قىچ ايغى بره وضع ايدي
زمانه
۱



قۇرلادى صول اوڭ ايغىلر صاع
قىچ ايغى بره وضع ايدي
زمانه
۲



صاع اوڭ ايغى بره وضع ايدي
زمانه
۳



۱. اكر ك خاىرى
۲. اكر ك ارك قاشى
۳. اكر ك ارك قاشى
۴. قولە سېمىدە
۵. اوزىكى
۶. ياھىر قاشى
۷. اوزىكىنىڭ قورلىرى
۸. اوزىكى زەھىر قەبىسى
۹. كېسە قېياھى
۱۰. كېسە قېياھى قاشى
۱۱. كېسە ياھىر قەبىسى
۱۲. خايش كۆپرەسى
۱۳. كېرەك
۱۴. كېسە رەسى
۱۵. چاغلە قاتىدە

۱۶. سېنە بېك
۱۷. سېنە بېك
۱۸. اكر ك ارك قاشى
۱۹. قولە سېمىدە
۲۰. اوزىكىنىڭ خېلى
۲۱. قولە قورلارنى
۲۲. قورلە قورلارنى
۲۳. قورلە قورلارنى
۲۴. قورلە قورلارنى
۲۵. قورلە قورلارنى
۲۶. قورلە قورلارنى
۲۷. قورلە قورلارنى
۲۸. قورلە قورلارنى
۲۹. قورلە قورلارنى
۳۰. قورلە قورلارنى


سىيىلدىن قولان

كۆنكە


قوسفون رېط قايشى

قوسفون

قوسفون قورلرى




31. 10.03.12




32. 10.03.12


برده بر زلف




تا هر صاف ده یا آن د کشید بر مک





کرویه چرخ حرکت



چرخ حرکت









- ۱ کمر آغزلی
- ۲ کمر قوللی
- ۳ مہلولو زنجیری
- ۴ کمر دیرکیندی
- ۵ النامه
- ۶ یناقه قایشاری
- ۸ بوغاز انز قایشی
- ۹ پرو نالعه
- ۱۰ قنطارمه
- ۱۱ کمر دیرکیندی

